

41
4

慶雲縣志

第肆冊

藝文志
新政志
雜志

慶雲縣志卷之四

藝文志第十

謨述

重修天宮寺碑

元恭知政事 商 珽

天宮寺在河間路之無棣縣西南隅左枕老鳥山之岡前面一河名曰鬲津迢遞而東西南濱胡蘇古河二水交流不舍晝夜感為漣漪怒為澎湃遠而望之如白馬銀山之狀其為龍宮秘宇之所托也固宜相傳唐太和中有大比丘飛錫而來徘徊顧瞻縛蘆栖止於茲厥後漸成巨剎樓閣崢嶸鐘魚互答於山光水色間一時龍象固云盛矣金末干戈四起官署民居盡罹毀

慶雲縣志

藝文志

謨述

一

壞寺亦不能以獨存金碧之區倏幻為瓦礫之場荒煙野燐更互明滅使人有悽然之思清海禪師自幼受經此地喟然歎曰在我法中有為無為皆為第一義諦起廢之任吾可不究心乎其徒數十人懼然從之遠募四方近乞鄉閭積三年有奇由是採木於林攻石於山徵甃於陶衆工雲集罔敢後時禪師躬程督匠幾忘寢食遂卜厥日以告成功寶殿中峙邃堂後居停挾兩廊前啟三門以至鐘鼓樓閣之類罔不就緒復播土肖佛菩薩暨護法金剛諸神像梵相嚴飭觀者生敬經始於至大三年四月訖工於四年二月因具其事狀來都下求予記予少與禪師遊瀛棣間十年知禪師道行非常請詳記之予聞大雄氏說

法者闍崛山有重閣講堂之壯麗所以真定其形軀庇覆其生
徒初未聞其露坐於日星風雨之下也世之昧者弗察悉諉諸
興造為人天有漏之因悵悵然曰吾志諸內不驚諸外彼後志
於事功者何為也哉殊不知般若場中事理無礙內外渾融徧
覆一切不即世間不離世間苟徒泥拘而墮斷滅之見則違道
遠矣今禪師耽悅禪味有所證入毅然建立無非佛事其知識
過人殊甚予備著其事勒諸堅珉庶可以戒世之馳驅空言者
禪師名德淨清海其號也周遊名山大川所至之處廢無不舉
今日之役其尤偉者也其徒則明觀明珠福海等行業皆有源
可稱云

慶雲縣志

藝文志

誦述

二

重修慶雲縣志記

明訓導 高 祥

粵自封建之法既廢始郡縣天下縣必設官官以出治治必有
所其來尚矣迨我國朝尤重守令其廳堂解舍胥有定式頒行
天下蓋縣令之治封疆百里戶口萬餘為令者坐而聽治民有
凍餒老幼疲癯而殘疾者甚眾及簿書期會訟牒委積莫不惟
令之劑量而調停焉是令之為令其責重且勞矣不有堂舍何
以竦具瞻何以節勞佚何以宣條教而撫瘡痍哉慶雲縣治創
建於洪武六年楊君思義實為之迄今雨淋風駛圯壞不支望
之纍纍若積薪然正統改元淇門王侯來宰斯邑一見歎息曰
修廢舉墜有司職也傾圯如此責將誰諉乎搜蠹損廩庀材鳩

工亟圖修之遂請於撫按部使諸公皆報曰可爰因舊址大加修葺頽者起之缺者補之卑陋者或廣拓之縣治中央為正堂五間前為儀門東西為吏房各五間又東為縣丞宅西為典史宅稍南為吏胥舍共六十餘間正堂後為燕息堂三間又後為知縣宅一十餘間儀門之外為大門三間東為神廟西為犴獄儲積有樓預備有倉又共十二間崇卑廣狹悉遵定制落成之日賓僚咸集稱觴屬余記侯之績余惟一興一廢者數之常而能興廢舉墜毅然任重而不辭者非有出眾之才不能也慶雲之有縣治迄今凡幾年矣慶雲縣治之敝非自今日而始慶雲之牧是邑顧是故者又不知其幾人矣率皆因陋就簡託以民

慶雲縣志

藝文志

撰述

三

力不瞻而止使天下皆若人則廢墜何時而興也大抵庸庸者無為矯矯者有功侯非庸庸者流也是以能饒積習之敝以成維新之功僻縣海邦一旦堂宇巍峩解廳繩直推是心坐而蒞政人有不儼然望之而生畏心者耶其發號施令布德行仁將何施而不可者自今伊始不但案無委積廷無滯訟以成坐嘯之治而一邑之民凍者餒者老者幼者疲瘵殘疾者皆飽撫字之仁而樂農桑之化矣侯之功何其大哉請以是書諸石庶不負我侯之功而後之蒞茲土者且知敬而承焉侯名恭由鄉貢進士筮仕今職仁心仁政為當道荐嘉今日之功其善政之一也因以紀正統二年八月立石

重築濬城池記

翰林
編修 周洪謨

慶雲縣在隋唐梁為無棣縣周置保順軍俱隸滄州至國朝洪武中始改為慶雲舊有城池坍塌已甚惟遺址尚存邑民苦於無所障蔽每聞盜賊邊警輒皇皇不安長是邑者亦有興念及此然又畏其勞民動衆欲作復止成化二年廷議凡郡縣無城池者有司宜擇農隙修築專遣憲臣奉璽書督之維時知縣事張君彪奉例創建河間太守賈公忠亦親歷其邑視之張侯計日誓衆殫力興作相地形限程度役十一里之民經始於本年十月至明年八月而工成城在高水之北去棣城五里計周廻四里高一丈五尺又濬池於下濶三丈深一丈洩水其中表立

慶雲縣志

藝文志

撰述

四

四門東曰瞻岱南曰觀瀾西曰拱辰北曰望海樓櫓睥睨悉如法由是崇墉屹屹深隍窅窅平曠之區變為金湯之固邑之士氓相與嗟歎曰如此壯麗自設縣以來未之有也吾輩得遊息棲止於其中不其幸與相率謁鄉進士張君希遠具其事來京徵余文書諸石余聞大易之訓曰王公設險以守其國孟子曰鑿斯池也築斯城也與民守之皆言守國以城池為重也守令者分符一方民人境土賴以保全於此尤不可緩侯能知所重而重之是以巍巍之勢雄鎮東南真足以捍外衛內無負我聖天子設土保民之意况慶雲地界青齊燕趙間魚鹽米錯百物交通負販之徒日經其境城池保障又所急急者侯之有功於

斯邑也豈淺鮮哉余又聞侯之為政寬猛相濟仁義並行不特
善良者知慕而奸悖者亦知所懲蓋得乎人和之本而不徒恃
乎地利之末者矣以斯民守斯城且常有賢令如侯者撫治之
有不足以屏藩王家永享太平之祚也耶侯由胄監來牧慶雲
家世河南之磁州人維時督是役者則縣丞張君志清亦與有
力法得並書云成化四年六月立石

重修天宮寺記

都中道深
僧人

直隸河間府滄州慶雲縣在城西南隅清高爽愷之地居仁坊
天宮寺之遠相傳名為古刹者矣洪為聖朝混一寰區四海咸
寧八荒臣服而猶宏崇吾教則嘗設官以掌之庶幾羽翼唐虞

慶雲縣志

藝文志

撰述

五

堯舜之治也先是永樂中尊宿喜貴大師以其才德兼備應舉
開設僧會司衙門已而天宮古刹之名興修所謂正殿天王殿
東西兩廊廡伽藍堂祖師堂齋堂禪堂方丈鐘鼓樓山門一皆
金碧交輝於殿塑莊釋迦佛彌勒佛藥師佛阿難迦葉十八羅
漢亦皆從於無相而現色相以為人天瞻視以成下方叢社以
為朝廷習儀之所以為黎民集福道場之有年矣然自昔未有
碑記以傳久遠由此其木山執事祖宏上人並善士張福進各
施已資並募眾緣買石將欲立碑與圓靜上人來京言其實跡
命為之記焉伏惟佛如來之道自流布於中原者其道之體用
元塞乎天地之無外貫徹乎宇宙之無窮蓋利益羣品而不擇

光顯皇圖而鞏固保安社稷而和平也然而今昔有賴國家大臣之所護持遐邇善信之所皈向則尤所寄歷代高明宏教者之所舉修遂得日盛月新之於是矣若茲剝先後皆蒙方伯大富豪檀越之所作興而得悠久即可驗也敢不記以見我朝崇獎之隆文物匡扶之美以示不泯哉然自開設以來紹席者曰昌鑑曰繼瑄皆為僧牧皆有道行見任會林字翠岩住持繼通字本宗首座昌缺號缺然皆能整飭舊規昕夕領眾至誠敬慎仰祝聖壽萬年及續傳燈千載俱有補於世教也併述為記焉
成化四年歲次戊子缺月十五日立石

重修廟學碑記

大學士 劉健 謚文靖

慶雲縣志

藝文志

謹述

六

我國家聖祖神宗繼元而有天下以學校人才之本政化之原於是斟酌隆古以來制度沿革設學教人遍及海隅至於所以為教之方則又一本先王修道之實故累朝頒降之典若大誥若五經四書若性理五倫諸書皆二帝三王之所以為治孔曾思孟之所以為教至論正脉之所在而異說他道一切不經非聖之言不使少接於心目其陶鎔人材化導生民之意可謂至矣然百餘年來四方都邑或宏才碩德先後傑出或高科異等累歲不絕或連數邑之眾絃誦之聲不聞此蓋一時分治教之責者有智有愚得人與不得之異爾慶雲為縣隸河間府太宗文皇帝肇建北京實為畿內漸染聖化之深學政人材視諸外

郡固當有間然亦未能盡如祖宗設學教人之盛意也縣學之
建久矣老屋支持不蔽風日師生講授於中者病之武昌唐君
璿來知縣事始有廢墜之歎僭縣丞韓君聰主簿高君明典史
陳君舉重修之謀以成化丙申秋經始功未就緒君丁外艱去
越己亥冬東萊宋君漢以名進士來知縣事固之益增飾工乃
訖自明倫堂東西齋以及師生廨舍皆煥然一新又增修退省
堂三楹為師生燕息之所既成宋君等率官吏師生置酒落成
僉謂宜有文以紀歲月訓導石州白君以書來予曰百工居肆
以成其事君子學以致其道蓋工不居肆則遷於異物而業不
精君子不學則奪於外誘而志不篤士固貴乎有學也然所以

慶雲縣志

藝文志

撰述

七

為學之方豈可苟焉而已哉我聖祖神宗作養之恩深矣太誥
之昭示經書之發明性理五倫之編集士之所以修之身施之
家推之國天下無一不具焉今日施教化者講授於學果能必
出乎此不遷於異說不惑乎他道涵育深而薰陶久必有宏博
之才碩大之士傑然有高科異等出以為世用者朝廷設學教
人之實效於是乎乃見矣不然雖日從事於學又何益於天下
國家哉白君嘗一見於京邸蓋謹飭之士也故因其請記並以
為學之方告於縣告於學與其諸生共勉焉成化十六年二月

吉旦立石

重修興隆寺記

佛氏之教代多崇重至我朝亦因之不替演經說法談論因果
蓋其初心本以勸人為善戒人為惡而欲人歸於長壽之域非
若後世言之之過故天下通都鉅邑名山大川代必稱寺以奉
之延生徒以闡之者得非因其勸善戒惡之功而不可泯滅也
歟慶雲邑治正南古刹天宮寺重修板撻營興隆寺誠為一邑
偉觀但東至棗園橋西至新店南至楊和尚寺北至玉皇堂前
人創建苟且而又歷以年歲凌以風雨殿宇不能無壞宣德年
慶邑民人李恕同郭寬遂發一念之誠拋棄室工屏絕家事謀
諸長僧如泰明源同募緣於十方大姓始得銅若干文遂鑄釋
伽佛一像文殊普賢二像觀音一像清淨大勢摯一像大海中

慶雲縣志

藝文志

撰述

八

一像天王殿伽藍祖師殿塑給孤長者二郎伽藍並羅漢十八
尊正德元年重修又郭曾李安同如泰等所積餘資遂捨木於
真定運石於章邱陶磚瓦於城南鼎建正殿三間高一丈九尺
有奇廣二丈八尺深如之塗以丹雘飾以金碧誠非昔日苟且
可比而足以扶持像教於不替也見者寧不有感於斯焉噫郭
曾李安一鄉人等披剝燈鉢之餘尚能崇信釋教之重而造像
作殿於以尊奉之於以邀其冥福矧今受民社之責讀聖賢之
書叨爵祿之享曾不加意於吾儒先聖先賢之地使其傾墻壞
壁而不為之修理耶予因其請特為之記非獨表郭李向善之
心而抑且為吾道中不思報本功勉見之者幸勿以怪是為記

正德十一年歲次丙子二月望日立石

請增燒造工價疏

邑人張問之

工部屯田清吏司郎中臣張問之謹奏為營建宮殿事臣近以營建宮殿奉勅前來南直隸蘇州府等處督造二樣細料方甄伏觀勅諭一則曰爾宜持廉秉公著實幹辦不許虛應故事勞民傷財二則曰仍須禁革奸弊約束下人勿得科擾貽患地方臣受命以來夙夜警惕惟恐事不稱職有負聖諭於今三年餘矣所幸兩次工程俱悉完備筮在六月初四日發舟解運復命待罪有日而一應燒造事宜積弊相承良法盡廢其所以傷財勞民而患地方者請為陛下陳之夫難成者不可以易視費大

慶雲縣志

藝文志

撰述

九

者不可以小成以今日之甄之略言之其土也必取而運晒而槌舂以確研以磨篩以羅凡七轉而後成其泥也必池以濾之由三級之筩過三級之羅且池以晾之瓦以晞之弓以勒之脚以踏之手以揉之凡六轉而後就以至坏之做也託之以板裝之以範以兩人共擦之以石軸碾之以槌平之端正日日翻轉之面面棚打之遮護之開晾之凡八箇月而始乾其入窰也修窰有費墊坯有費其發火也一月而糠草二月而片柴三月而顆柴又四月十日而枝柴凡五箇月而甄始出况澗及二尺二寸一尺七寸復欲其完全端正聲音清響色道純白故常取一而費四五夫何有好名者出乃廢初法而定為價然猶可也以

奸相承爭相消滅遂至於取民間之粗輒而定為今三錢二分
二錢七分之價夫民間所用之輒視此幾十百倍可比而同之
耶此前日燒造之民所以產盡人逃禍及親鄰而親鄰之禍又
親鄰也故臣燒造命下而此等之民皆以望風逃去比臣既至
而親鄰亦莫可跟究矣其招復之難處置之難督責之難萬千
難狀何者工程細密民貧價減賠費之繁有不止於身家十倍
百倍之不及也且如蘇州一府燒造之民止於長洲一縣為家
六十有三其每名分輒不下三百餘塊如每塊賠銀止於七錢
則每家分外已賠銀三百十兩有餘矣臣雖今日得借撫按委
曲完事要之不可以為常也故臣不揣愚昧將一應燒造事逐

慶雲縣志

藝文志

謹述

十

一畫圖貼說總叙於後具本進呈奉瀆睿覽伏望皇上特勅該
部從長計處且擬上請定為欵價使永為遵守官民兩便緩急
可憑國家幸甚生民幸甚臣不勝恐懼屬望之至

此疏今載
四庫全書

重修廟學碑記

教諭 張 寵

學校之興廢其關於天下國家者為甚重人材之盛衰風俗之
美惡政事之得失恒必由之自古帝王興道致治莫不以是為
先務而守令之賢者亦必加之意焉考之經傳可見矣我皇明
自洪武二年干戈甫定即詔天下郡邑皆立學期於化民成俗
以復先王之舊意至厚矣天下敬承休德百八十年治化之隆
追蹤古昔有由然哉慶雲學自始建至今惟正統及成化間一

再修之舊制復卑陋弗稱歷年滋久敝可知矣嘉靖甲辰冬質
菴李公以陳留名家中州高薦承命來知縣事詣學謁聖廟見
陋敝狀惻然以為己責亟欲新之顧邑凋瘵諸凡叢委力未可
為日亦不給咨嗟踧踖者歲餘既而政行務舉壅滯疏決乃與
吾一二僚屬及邑之士大夫合謀修舉且捐俸資若干以為眾
倡眾皆樂從率得金百五十兩曰是可以為木植費矣餘當以
漸自辦無難者遂請於當道卜日戒事止役百夫務閑而舉農
興輒輟以為常凡碑石瓦甍工匠匠餼廩之需皆約已節用以為
之所劑量輕重次第舉之經始於丁未之冬歷己酉春而事畢
役雖久而民不以為勞費雖多而民不知所出蓋深得夫大易

慶雲縣志

藝文志

撰選

十一

節以制度說以使民之義語其成功則崇臺危溝畫棟丹楹有
廟翼翼矣前之櫺星門中之戟門東西之兩廡外之周垣皆革
故鼎新腹壘相輝與廟稱矣明倫有堂進德修業有齋皆易其
朽壞拓其規制足以容講習矣庠門之卑陋也而高大之儀門
之未有也而增置之有以利出入矣敝陋傾圮之所一變而為
壯麗宏肆之區蓋自有邑以來未之見也士眾咸喜請記之寵
辭不獲乃諗之曰諸君知所以修學乎夫學非宮室之謂也以
吾人進德修業其中而強名之也今夫門牆之不完棟宇之未
壯塗墍之不飭孰不曰有司責也苟完矣壯矣飭矣有司之學
修矣人將無我責者乎必禮義廉恥以峻其門牆孝弟忠信以

隆其棟宇威儀文辭以美其塗墜而加之以日新然後謂之修學學修則道成可以化風俗可以翼皇猷而有司之興學者亦與有光朝廷作養之意庶幾不負不然學自我廢雖華構連雲雕甍蔽日何所取於學耶諸君其念之哉諸君其念之哉衆皆唯唯遂記之李公名宋字承殷為邑有惠政清譽其他所建如城郭倉廩橋梁館舍之類未可盡舉後當有名筆記之茲不贅嘉靖二十九年歲在庚戌五月吉旦立石

奉例均田記略

知縣 杜 爵

伏觀均田事例頒行中外誠愛民之良法也予嘉靖癸丑春授知慶雲至邑月餘見庶務廢弛賦多不平或地多糧少甚至有

慶雲縣志

藝文志

謹述

十二

地無糧或地少糧多甚至有糧無地隱脫者得以奸脫貧難苦於供代於是遵奉欽依均田事例遂於三十二年夏先令民各自從實開報又明年春復令里直人役履畝丈量數比前雖增而隱漏之弊猶多也於是年冬親丈其畝復定步弓用夫引繩置立坵堆栽定牌樞將縣城為中坵沿城四面為八邱五頃四十畝為成數接續八邱魚鱗而丈取十字文為丈分之紀從乾字號起丈北面從良字號起丈東面從巽字號起丈南面從坤字號起丈西面自十一月朔至十二月終計丈得地五千三百六十頃九十九畝四分五釐三毫矣畫以地圖區別三等厯畝而有則糧草馬站分等均派視則而有定地畝既均民無異辭

申呈太守太守陳公批曰均地均糧任勞任怨足見本官留心
民瘼加惠地方餘地均平則原額分數不失遺奸弊盡不滋矣
猶慮法久弊生復與衆議將均過地糧分里開載成帙勒石庶
傳久難變故諸士大夫耆庶以所述付諸石工勒焉嘉靖丙辰
十一月吉日立石

重修德安寺碑記

吏部尚書楊 巍

陽信有孫覓泉者吾友也與其弟小園皆尚佛氏一日小園偕
德安寺僧悟通過吾桃花嶺小園謂悟通所住寺乃齊武平年
中建有白石佛二尊今增塑十六羅漢像又新其殿宇助其功
者幾百家聞公善人也求一言記之吾嘗謂方今天下賦役繁

慶雲縣志

藝文志

撰述

十三

興吾民日受箠楚不能應上所求佛老二氏稍有意向輒助之
以就其工上之於民曉諭藹切藐焉莫聽一聞二氏之念誦即
願皈依此何以故也蓋古聖人之教民也勞來匡直輔翼振德
如此其至務使得其本心以臻壽域當其時惟知有聖人雖有
佛老無由以行其說迨至春秋戰國日相爭鬪視人命若草菅
士大夫溺於富貴紛華之中若醉夢焉不醒所以匡救之者猶
幸有孔孟也秦漢以來爭鬪未息富貴紛華之習日甚又無聖
賢如孔孟者匡救其間一但聞佛氏慈悲之說老氏清淨之說
若在火宅得其門以出也若黑風飄船墮落鬼國有物以負之
而登岸也若服椒桂荼董裂其唇吻而得淡然之味也豈惟細

民雖士君子亦靡然從之誠有以合乎心而投所好矣故人但知二氏之可從而自昧其本心但咎人之從乎二氏而不知吾無以倡之也吾平日所論二氏者如此今觀悟通一人乃能修殿宇塑衆像豈非人之樂於捨施甚於筆楚者與豈非藐於上之曉諭而依其念誦者與豈非以善而歌動人心者與益幸吾所論者驗矣問其寺在慶雲陽信兩境之間聞吾之言者或知善本在我士大夫復倡之以善去其爭競紛華之習使人之皈依不獨於此也吾所謂善者孝父母敬長上睦鄰里勤稼穡如此而已矣悟通武定州人俗姓李氏能解華嚴法華二經知韻學乃合掌言曰善哉聞公之言和尚亦知所皈依矣因次第其

慶雲縣志

藝文志

撰述

十四

言為記且質諸菟泉以吾言為何如也萬曆四年八月吉旦立石

邑侯王公生祠記

邑人張勳

邑侯心一王公關西佐輔人咸平丑進士萬曆庚戌冬謫蒞吾邑當大祲後十室九空民不聊生公下車一意拊循之甚得民心喜其來悲其暮又惟恐一朝遷去也怙之恃之如嬰兒之戀慈母云壬子七月公奉詔擢為廷尉老稚如失父母無不流涕數百人集庭借冠但上命已下代者有人八月內竟飛馬去矣去之日送者塞塗士有祖帳有冊葉又有別圖民且悲且號有歌有謠又跽留冠履以寄思思起於感感公之澤何日忘之思

起於離離公一日思日甚一日於是父老數百人公同庠生輩
議建生祠以志不忘就諸鄉紳而託記於余余授司學時受公
知習公德政令與子民同沐惠養教訓如之何勿思公非使人
思我而不能使人不思我其愛民無日不為地方計大都約已
裕民所用布米出囊資買自東省止飲無棣一點水耳肅清衙
門別盡宿弊訟勸和有問折以片言不罰一錢糧勸納火錢易
諸他境無羨一文雲境沿海多瘠率荒本業輕遷徙公勸以男
耕女織鑿井種樹採薪煮鹽隨力所營招復逃戶輕其丁差又
踵前任益都熊公買牛墾荒故事捐俸買牛六十四隻給有地
貧民民多安業辛亥春旱齋禱於廟社靈雨應之夏水秋蝗

慶雲縣志

藝文志

謹述

十五

三時有害一粒未登每單騎下鄉星出星入條陳民間凶荒之
狀極力請救當事者築屋有賑枵腹有賑老幼有粥癘疫有藥
道僅有理災民全活至今誰之賜也審編則均戶除逃亡鄉約
則尊高年重有德激勸則旌節婦獎女貞正祀典以要神明理
冤獄以招覆盆清房耗以均門役嚴保甲以戢夜警禁宰殺以
廣好生革積牙以平市價因涉水而修理橋梁因踏災而疏通
水窪因雨淫而築鑿城池鼎新庫樓因震鄰而習弓矢以戒不
虞因舉火而搜盜賊靖地方民亦有寗宇矣而公之心未已復
社學講鄉約旌申有亭木鐸有徇勸民省事勿奢忍事勿訟即
遇罪人導以聖諭六言動其良心文人給忠孝經一冊以為子

臣鵠嘉意興學葺廟宇補閣樓建文昌於東南復學宮於西北見某生飢則食之見某生寒則衣之資其燈火卹其死喪督諸生先行後文課文有供有據復手自為式散古書以示楷指好事以示因浸浸乎多文行士司文衡者錄質行加科舉額公之教也傳稱盛德必百世今公行矣遺愛如昨大有造於吾邑將百世如一日也可無祠乎祠之者祠所思也士思曰公行矣孰周吾急孰發吾蒙農思曰墾我荒緩我徵者非公耶窮民思曰築我屋療我飢者非公耶逃民思曰復我業免我差者非公耶工人商人思曰卹我私蠲我稅者非公耶公有遺愛如之何勿思公行矣所為養人教人者其澤一一在也公之澤在公之像

慶雲縣志

藝文志

撰述

十六

儼然在也戶而祝之萬心一願其何能忘於是乎記萬曆歲次壬子閏月吉日立石

西胡莊泰山聖母行祠記

邑人胡時薦

慶屬瀛海下郡彈丸黑子最號僻壤方諸洪都鉅鎮奚啻培塿之於太岳然地雖編小轉有以小天下者政不在幅帙廣濶也邑之兌方距城數十武迺胡氏桑梓鄉鄉西泰山聖母行幸之區鼎建於嘉靖之乙卯迄今天啟之辛酉年所多厯殿宇傾圮見者心惻已有鬱勃革故之思然且開年以來赫赫威威之靈救人疾厄蘇人命脉於假寐中施一匕神樓者不一而足以故悚動里閭各捐財物不浹辰而廟貌聿新焉營室於廟之後則

神之香火有主矣鑄鐘於廟之側則神之聲靈如在矣廟前則門衢之洞開也廟左則土地祠之雄峙也一併修葺則神之環拱愈密矣然則登斯祠者凜靈應於在上覩落成於俄頃即不著木履不衣葛巾往陟東岳之空濛不飄飄然有小天下之思耶矧辰舍辛酉辛日重光酉日作噩則取先甲三日者以為重新之圖取後午三日者以為作興之計順時令益所以要神明也故記載一時之曠舉以誌不朽云天啟元年歲次辛酉仲呂月中浣之吉

社學碑記

清知縣 李興祖

粵自社學之制所以造就孤寒補敝起廢為國家教育人材之

慶雲縣志

藝文志

謨述

十七

一途蓋亟亟乎不可緩也慶邑人文鬱秀甲於瀛郡負奇抱瑰多出貧窶昔有社學久遭兵燹頽廢無存今聖天子右文敷治以興教化為首務余忝牧茲土職居師長竄忍膜視不舉棄其俊髦於是商諸學博許君司訓張君縣尉王君暨闔邑紳矜以社學之建毅然身任創捐薄俸共助資糧鳩工具材相學宮之震位構講堂三楹門房一間左右廊廡六楹自是孤寒伸志擔登負笈朝吟夕誦不虞潛修無地訓迪無人將見人文蔚起殆必有邁於前人者矣康熙十五年八月吉日立石

奉例均田碑記

李興祖

余既令慶雲之四年日勉修厥職曠弛是懼丁巳奉有履畝清

丈之行仰見我朝定鼎以來於民生利弊諳切詳慎煌煌鉅典賦額由是以清徭役由是以定甚盛舉也查邑志故明嘉靖丙辰令茲土者杜公爵奉例均田自為碑記迄今百五十餘載矣相沿日久里書飛洒冊籍混淆或造冊作弊者有之或推收錯誤者有之或賣出九畝而開付十畝以少作多賣主留一畝無糧之產買主辦一畝無產之糧者有之大造一次必多一次之差訛推收一番更添一番之弊實且其間孫承祖業子孫不知舛謬前冊無憑改正無論究之不可勝究且人亡事久歲易代更安能起九原而問之哉今畧去崖岸槩免已往嚴禁止以令丈為始入冊輸糧倘復行欺隱方行科罰於是勒令自首單騎

慶雲縣志

藝文志

謨述

六

躬親履畝踏丈除實在貧窮有糧無地困苦無告者急還缺額復業外查出地二百一十六頃有奇繕冊申報載在全書是役也始於康熙十六年四月十五日經兩閱月乃竣厥事日行風日之下夜宿野田之間勞不敢辭怨亦聽焉周世宗嘗夜讀書見元稹均田圖慨然歎曰此致治之本也行王者之政其必始此矣然治人治法兩者相須行之而善息民而非以擾民清弊而非以滋弊余不敏殫精竭思庶幾上以紓朝廷之課下以悉閭閻之隱而已何多讓乎紳士耆庶請照例立石以垂永久因述其概如此故記

重修臨津樓徵詩啟

府志借刻
蔣錫震

劉元宰

蓋聞輞水淪漣時載右丞之咏鏡湖上下不忘賀監之吟雖亭
作於智仙記傳太守即閣崇於帝子序藉書生若非重以如椽
豈能藉以不朽如直隸慶雲地濱海澨星次危分噓氣成雲色
由斯而得慶環河作帶樓用是以臨津想季前之遺風幾經千
載思伯禹之明德半屬九河若禹津若胡蘇若馬頰左旋右繞
俱收指顧之中如落雁如卧龍如老鳥極委窮源盡塞咽喉之
隘棗城煙雨便是物華杏岸晚雲無非天寶况蟠根仙李故唐
之相業斯宏洎奕葉猗蘭有宋之人文特盛他如修山深水一
筆來蘇古渡寒皋三橋通濟白雲綠渚徧題咏於前賢素壤黃
花留吟哦於後哲然而花飛草歇無感不衰薪盡燈傳有開還

慶雲縣志

藝文志

撰述

十九

繼則臨津樓之重建自我朝副憲薛公始也是樓斜連續野直
接迎薰較落星之高去纔尺五規齊雲之麗極備萬千白水澄
鮮平吞遠瀨明霞炫彩遙映晴嵐喜出入之魚龍層層狎浪羨
浮沈於鷗鷺點點衝波謂八景皆遜其天然意四時益增其勝
概神怡心曠何妨把酒臨風海濶天空真可登高作賦嗟乎先
憂後樂當求古仁人之心繼長增高不負斯作者之意懼竹樓
之易朽覺是無聊笑黃鶴之難捷終為使氣苟置身百尺何人
之致偏豪更極目一層若個之詩為最所望錦心繡口噓成異
彩縮紘鸞管龍文煥作天章爛漫或鉅公退食還霏玉屑微塵
抑名士揮毫不吝吉光片羽憑欄長嘯賦就仲宣刻楠留題詩

成夢得恭聆高語看驚天上星辰佇聽明吟散作人間珠玉

重修明倫堂碑記

知縣 鄧 岫

明倫堂之設，綦重矣哉。植綱常，彰明教，修之於身，推之於家，措之國與天下，皆是道也。聖人建學，名以揭之，地以律之，有師儒以闡究之，鉅典煌煌，萬古莫易已。慶邑明倫堂，不知廢自何年，大抵戶多凋敝，歲有災祲，各當事竭蹶扶傷，不遑學校是問，以故荒烟零落，鞠為茂草，固無足怪。癸丑冬，余奉委署篆，謁聖廟，慨然久之，遂有重建議。明年春，調署井陘，事以不果。乙卯，余復蒞茲土，私心竊喜，以修建明倫堂為務，不閱月而虫災告次，丙及丁旱，湯洊至，為民謀朝夕，鹿鹿風餐露宿中，殆日不暇給，豈

慶雲縣志

藝文志

謨述

二十

非有欲為之心，無可為之時，處不得為之勢耶。雖然，倫者生人之大綱也，明倫者，父母師長之職分也，邑無是堂，而聽其因循廢置，則宰士者之責，亦鄉士大夫之羞也。於是商諸學博，創捐薄俸，一時紳士，有飲水思源者，亦莫不欣然樂助。爰擇吉興建，始於己未之夏，歷秋杪而落成。董其事者，劉君顯世，馬生永齡也。是役也，所費弗繁，所闕實鉅，願列膠庠者，先之以道德，輔之以文章，履其地，思其義，比閭族黨，咸知彝倫之大，身體力行，斯須勿懈，是則余之所厚望。若第以為修舉廢墮，而不知其所係，在身與家國天下之重焉，則將等諸尋常，復名勝修古蹟之舉，而豈余今重建斯堂之志也。與是為記。

重修慶雲縣學碑記

知府 金文淳

郡縣有文廟。始自唐貞觀中。而漢文翁治蜀。嘗立學宮。畫孔子及七十二賢像祀之。率諸生講肄其中。當時第其治行為天下第一。蓋化民成俗。未有舍聖人之教。而能奏循良之績者也。慶雲本古無棣縣。前明洪武初始析置。邑令楊思義移廟學於今縣之東南。正德嘉靖萬歷間。遞加修葺。規制始備。歷年既久。至國朝康熙五年。邑令李居一復重葺焉。今又百年矣。雖殿宇巍然。而櫺星頽廢。泮池淤圯。照壁闕門。缺而未備。歲在癸未。予自襄國調守於津。汪君繡林以丞銜署茲邑。謁廟之始。即慨然為已任。捐俸若干金。勸率紳士亦罔不踴躍者。共得白金四百兩。

慶雲縣志

藝文志

謹述

三

有奇。重建櫺星門三椽。建東西兩闕門。圍以重垣。中為照壁。戟門之壞者補之。泮池之圯者甃之。正殿兩廡。莫不度加整治。工未竟而力已竭。予行春至縣。敬往瞻焉。乃益以公費百金。用觀厥成。由是神廚供几。階陛甬道。文昌魁星諸閣。罔不塋茨甃甃。丹堊煥然。蓋首事於仲春。告竣於季夏。邑之紳士。無不欣欣喜色相告。慶文教之有成也。夫慶之為地。分古邑之半。僻近海濱。土窪斥而民貧瘠。故自有明以來。屢修而屢壞者。殆亦物力之艱也。今汪君一呼。而衆士畢應。鳩工庀材。實堅且好。則其政令之行。又可知也。且汪君用貨出仕。不由科目。而能亟亟然務其大本。急其先務。使一邑之人。羣知趨風慕義。樂聖人之教。而觀

王道之成，是尤有足多者。余樂得而記之。汪君名喬年，安徽六安人。襄之者，教諭秦其昭，東安縣舉人。督工者，邑孝廉劉煥。例得並書。

庠生鄉謚恭毅拙菴劉元宰墓誌銘

山東按察使 黃叔琳

距京師南六百里，為慶雲縣。古所云北至無棣者是也。水深土厚，風氣淳樸，異人生焉。而以肩壽為典型者，首推拙菴劉君。君諱元宰，字襄哉，拙菴其別號也。公既邵於德，而齒復邁，常什佰其極危扶困，為鄉祭酒者幾百年。乘雲之夕，聞者咨嗟。士大夫吊於其家，莫不涕泗沾濡，為詩歌以輓之。既而公議為謚曰恭

慶雲縣志

藝文志

謚述

二十二

毅先生云：公為人外癯內清，長不踰中人，而聲敕如鐘。聞者聳異，暮年耳目聰明，手足便利，無龍鍾老人態。常跨馬據鞍，顧盼自喜。冬月嚼瓜盡數器，旁觀者口噤舌橋，不敢下。而公飲啖自若，人咸異其事。夫壽為福先，人皆豔羨，而不可以智力爭。莊子曰：吹啣呼吸，吐故納新，熊經鳥伸，道引者，每宗以為法。而驗者恒少。他如漢之商皓，唐之耆英，宋之彥博，皆勲業者。一時聲華榮奕，禩而書之史冊，不過八九十歲止。公獨以優游泉石之身，備閱兩朝，而其齒較諸君為更溢。此豈可以尋常測之耶？公先為順天之武清人，數傳徙滄州，又徙慶雲。居者凡數世。值明季兵亂，公兩兄皆死於兵。公瀕於危者屢矣，皆倖而獲濟。若有人

相之者、豈非天哉、公之先數世無壽考者、及君遭父憂、寄葬南村、君日夜為謀葬計、後與青島家尋佳城、得地於高津胡蘇兩河交流處、術者曰吉卜、如術者言遂用之、自是而公壽百齡、即下而子孫亦無不接續登髦、耄振振者幾百人、其盛遂為河北冠、人曰君之壽、殆孝思為之、理或然也、家素饒、兵火後罄如也、及公而家計漸豐、好周人緩急、有古義俠風、公娶於陳氏、巨室而豪、公不藉錙銖潤、及陳扼於官、為之挺身出辦、事解乃已、人皆以為難、塾師某無子、偕老妻館其家、比歸、輦致雙棺、實以米麥、邑為孔道士之糊口、舌耕者多望門如歸、君必量力周給、人如其願以去、有不逮、輒為之於邑者數日、以故公之生、人皆

慶雲縣志

藝文志

謨述

二十三

尸而祝之、社而祭之、雖千百載無厭、經云、惟仁人斯壽、劉君近之矣、是時公既以壽高、河北邑大夫欲上之朝、堅不可曰、吾不忍誕以希榮也、年九十有九、飲啖起居如平時、忽晨示子孫曰、人壽百年非易、吾將舍爾等以遊上清、遂口占辭偈以逝、窺其意若先知者、豈仙家之所云蟬脫耶、佛家之所謂無生耶、異哉、家門鼎盛、子孫幾盈百、溫清不能盡識、但頷之而已、每朔望皆集君側、君必告以居家為人之道、其言以近思錄為宗、而於顏柳家訓尤諄諄焉、以故子若孫發文科者二、發武科者五、一門之中、衣冠濟濟、而子孫恂恂、居鄉黨不敢以貴盛自多、見之皆識為劉氏子焉、嗚呼難已、公少負經濟才、而不獲一試、自補博

士弟子負後不復言舉子業。惟日以吟咏為事。如集中所載諸詩。皆抒寫性靈。不事雕飾。讀之者如見三百焉。及晚而身老才壯。有所作即為人傳誦。慶雲學宮久圯。公糾眾捐修。且設法為永久計。邑有臨津樓。為宋蘇文忠公遊覽地。君亦興其廢墜。竭力鼎新。率四方君子歌詠之。先是慶邑不發科者六十年。茲樓建而繩繩不絕。此皆公之軼事。班班可考者。君之高祖諱復初。庠生。有賢行。曾祖諱近道。壽官。祖諱正心。個儻有幹畧。議叙七品職銜。父諱其醇。號凝白。邑廩生。舉孝行。載邑乘。於雍正十一年。奉旨入忠孝祠。多隱德。貸人金計二千餘。易箒時。悉令焚之。其壽域即所稱胡蘇交流處也。則天之所以報施於公者。蓋有

慶雲縣志

藝文志

撰述

二十四

是夫子三人。孫十六人。曾孫十九人。元孫十七人。來孫二人。擬魏科。列庠序者。指不勝屈。余於己酉之歲。僑寓姑蘇。而君之孫夢楫。為華亭令時。晤余於邸舍。述其家乘最詳。余每歎以為難。今年春。余在任東臬。華亭令走書賀余。而以其祖之墓銘為請。余以桑梓之誼。且官為舊吏。氏不可不誌其盛。遂諾其請。昔韓退之為人作誌。而皇甫湜譏之。蔡中郎為有道碑。而自以為無愧。余之為此。為中郎。不為退之也。銘曰。

高津之野。篤生偉人。淑慎其行。金石其身。振振繩繩。福及後昆。允罔斯慶。高大其門。返真還璞。乘彼白雲。揆詞勒石。壽比貞珉。

清封振威將軍馬公墓碑

先生諱奇峯，字雲嵐，祖居慶邑高津河南之中馬家村。馬氏為慶雲望族，先世多業儒。先生生有至性，少孤居喪如成人，事母以孝聞。母喪哀毀盡禮，幼賴叔父教以成立。故事叔如事父，叔故亦如三年喪。先生性嚴重，不苟言笑，好學不倦，於經史諸子百家無不讀，為邑諸生有文名。科歲試必列甲等，隸學籍後即食餼，然屢躋於鄉舉，竟不得一第。非文章之過，殆有幸有不幸焉。先生品學既重於時，邑中學者多從先生遊。入泮食餼者，指不勝屈。若秦君夏聲、駿聲兄弟，尤推高足。故當時文風之感，以先生門牆為最，而先生之講學也，以道德為歸，以忠義孝弟為本。片紙隻字，不入公門，故門內率多篤行謹飭之士。即年齒已

慶雲縣志

藝文志

謹述

二十五

長，猶循循執弟子禮。鄉里見先生至，無不肅然起立。其為鄉人矜式如此。嘗與門弟子論古人節義忠烈之事，則感慨歎歎，若不自禁。道咸間，洪楊倡亂，蹂躪十餘省，捻匪繼擾，河南直東往來奔突，於黃運兩河之間，而慶雲適當其衝。城既不完，又無兵扼守，時承平久，百姓不知兵戈者已百餘年。一聞賊至，則相率逃匿，其慘遭殺戮，不可勝計。縣令畏賊，先去以為民望。於是先生乃倡團練，眾皆樂為用。羣推先生為長治其事，眾甫集而賊至。先生遂率鄉團數百，與悍酋小閭王張總、愚任柱等大股戰於縣城東。眾見賊大至，皆有懼色。先生執戈大呼曰：「今日之事，退必無幸，毋寧殺賊死耳。」於是眾皆奮然曰：「先生且如此，我與

若又何愛此生為。乃爭先搏戰，殺賊過當，賊見我無援，且以鄉兵易與而欺之，蠱擁而進，顧所帶鄉團死傷相繼，先生知事已無濟，揮眾令速去，自為計，或勸先生同去，弗許曰：勿顧我，力盡遂被執，猶罵賊不絕口。先生長子龍文，時從先生殺賊，為賊所得，遂同時遇難。此同治七年四月十日也。時先生年
歲，而長子龍文年裁
耳。嗚呼痛已。當清朝嘉道咸同間，教匪粵逆，毒荼海內，一時募鄉兵殺賊者，如劉公清、蓋君方、沁林君嵐、羅忠節、李忠武、李勇毅、曾文正諸大人先生，皆功震一時，名垂不朽。然或以官吏，或以鉅紳，大都皆有所憑藉，故其事尚易集，而得以有成。先生以一介寒儒，獨以學行為鄉黨推重，遂

慶雲縣志

藝文志

謹述

二十六

慨任其難，奮不顧身，以數百子弟與敵眾數十倍之悍賊抗，臨難捐軀，父子同盡，其所處之難，較之曾、李、羅、劉諸公，殆有甚者。而父死義，子死孝，初無所謂功名之念，稍存於胸中。設使先生以師道自處，寇至則去，寇退則返，人亦孰得為先生責者。然則先生固可以不死而竟死，而且竟父子同死。嗚呼，可不為烈士哉。夫使國之人，皆如先生，能不受其身，以愛其鄉里，且推所以愛其鄉里者，以愛其國，則吾中國之強且久矣。事定，大吏以先生父子死難狀聞於朝，奉旨著照教諭在任殉難例，賜卹蔭。世襲雲騎尉，以恩騎尉世襲。罔替。先生長子既同殉，次子即以世襲雲騎尉累功，至前清花翎記名，簡放總兵，今為中將三等文

虎章特授奉天東邊鎮守使龍潭也。先生有子以死孝，而後有子以武功顯其親於後，則先生為不死矣。先生之卒於今四十年，而鄉先生之講學者猶盛稱先生弗衰。先生弟子今尚存者年皆七十餘矣。復談及先生之教澤及殉難事，輒歎息流涕曰：是惡可不有以述之，乃為文鐫碑於先生墓，系以銘曰：科第之故，文弱波靡，誰砥其行，惟誇以辭。先生講學以古為師，義在必蹈，弗避艱危，何來窮寇，擾我梓桑。先生奮起，往扼其吭，父子並殉，以身衛鄉，豈惟一鄉，實國之光。先生雖死，先生有子，而兄有弟，而弟繼起，嗚呼，先生可勿悲，而後之覽者可長思。

紀恩碑記

總督方觀承

慶雲縣志

藝文志

謹述

二十七

慶雲為津郡屬邑，僻處海濱，厥土鹵瘠。乾隆八九年，畿南仍歲旱災，而慶雲尤重。余時偕陶公正中董賑事，數過其境，輒蒿目而傷心焉。仰賴皇上如天之仁，拯救多方，悉破常格，前後賑米幾三十萬，復以茲地商販罕至，輸河南大名之糧，以贍者至再，於是人慶更生，流亡稍稍安集矣。然而未有長策也。越明年，大興水利，疏邑之馬頰河及其上游鹽山之宣惠河，以蓄霖潦，又明年，俞欽使尚書劉公請大發帑金，開井泉，給牛力，並導以種樹之利，會余備官藩司，率守令悉心區畫，相其土泉之宜，度其溉引之便，均其服耕之候，謹其培護之方，而又為之檢登耗察，勤惰，期有實效。以上承德意，凡官為穿井一千二百五十，給牛

五百四十有六種樹三萬費帑一萬三千九百兩是年又奉旨免慶雲額賦十分之三永著為令於戲恩何渥也後數年余膺節制嘗因勘河之役往來於此見夫邱墟煙樹蔚然成陰轆轤相聞蹄趾交錯抱甕扶犁者行歌隴畔不復知有昔年飈戾荒寒之象蓋聖天子至德鴻龐淪肌浹髓感人心而成風俗宜其轉移之效若是神速已今年春邑之耆老因其令李君蔭椿來請謂曩者歲偶稔朝廷傾廩藏以活我復又資我井養助我力耕毓我材用薄我稅歛二十年來室家保聚衣食宴如緩急無恐吾儕身被之猶能舞蹈言之恐後世子孫食其福而忘所自也敢丐文勒石以垂不朽余嘉其誠且親見其人之瀕於溝壑

慶雲縣志

藝文志

謨述

二十八

而遂得生養以至今日也為之雪涕而告曰爾知帝德之不可忘乎爾有井勤浚治之爾有牛益孳息之爾有樹木時封殖之且賦已減矣輸將宜亟也老幼有養矣禮教宜勉也爾其率子弟力田孝弟以上答天庥而為之長吏者視民如家舉凡良法所在設誠而致行之非直瘠土為腴必且豐年屢慶於以被鴻惠於無窮流膏澤於萬禩豈不休哉用是敬紀其本末勒之學宮俾士民有所觀感且以驗後之官斯土者

慶雲縣創建學署記

教諭秦其昭

凡州縣有學必有署定制也慶邑之職是學者厯惟僦屋而居按之邑乘載有正副兩署然基址杳然即耆老亦未有能記憶

者蓋荒廢由來久矣余以辛巳季冬來司邑鐸歷三載知邑紳士之可與謀也勃然思起而創舉之乃置酒延紳士計議莫不欣欣踴躍願有以副其興復之心爰是經營相度於明倫堂之東北劃定規曾不半載而簷宇在望矣正房五楹東廂三楹西廂兩楹繚以週垣閉以重戶廚廡班房俱備圍牆外又結茅屋四間移看學家之亞旅以衛之共用錢二百餘計勸捐積錢一百五十千有奇自捐俸錢五十千有奇遂相與觀厥成焉自余來慶之後學宮櫺星門內外修廢增制者為邑侯汪公府憲金公以文昌閣之頽於前也又捐助而更新之重修尊經閣巍巍而輪奐者為邑侯李公周匝圍牆又謀所以堅築焉是皆余所

慶雲縣志

藝文志

謨述

二十九

目覩而襄其事者邑紳士歷有捐貲具有碑記以此見邑紳士之可謀成也故志之勒諸石以箝之明倫堂壁之左乾隆三十一年歲次丙戌六月之吉

新建義學記

知縣 白貽遠

國家崇儒重道凡內外郡邑皆立有書院義學以期化民成俗尊賢育才於時俊彥鴻儒藹藹濟濟先後蔚起或闡揚理學或高擢巍科下逮里巷鄉曲亦莫不人敦禮讓戶習經歌菁莪棫樸之化超越千古此立學之效甚大且遠而分治教之責者之所宜亟講也丁亥春余恭膺簡命承乏斯土甫下車即詢之父老求所謂義學故址歷久傾圮興廢始末已不可考時即慨然

以修復為己任顧以災歎頻仍撫卹方殷諸務叢脞未遑也數年來壅滯稍疏乃與一二僚屬及邑之士大夫僉謀修舉且捐俸資以為衆倡衆亦莫不樂輸共得金若干乃庀材鳩工改卜隙地於黌宮之東偏既近奎光又遠塵市爰先建講堂三楹以植其基凡羣房門墻漸次增修又慮修膏無出於檢校簿書之際得地三頃八畝內腴地若干名佃認種通計得租價銀五十兩以其四為師生薪水之資以其一為隨時修補之費越三載厥功既就余方幸藏事之易而邑之士大夫亦共樂創建之有成而又慮其久而或湮也咸請余記之余惟夫學校者風化之所由關也義學者人才之所自出也學立而本端本端而化行

慶雲縣志

藝文志

撰述

三十

化行而俗美而又藏修有其地資用可常繼自能不遷於異物不惑於他政涵育薰陶日就月將必有瑰奇之彥傑出之英奮發青雲以接踵而興聞風而起者則此舉非一時之計而實屬闔邑千百世無窮之計也顧余念之昔人有言蘧伯玉恥獨為君子斯義學之建余雖初創其基而尚慮不克保其終至於修而葺之拓而充之俾已成之功已獲之地勿為豪猾侵占勿為風雨飄搖振興栽培匡直輔翼改義學為書院繩繩繼繼永久弗替是有望於後之蒞茲土者而非余所敢獨矜其美也爰序次顛末而為之記

觀風教

知縣 潘國詒 留雲

蓋聞任事為士鄉里先論秀士而升司徒載道以文朝廷必觀
人文以化天下故士須大比期不隔於三年而文與細論職在
膺夫一邑五步豈無香草九還自有仙丹笥在腹而錦在懷奚
殊山玉潤珠之彩筆是鍼而墨是灸抑藉楹書家鉢之傳振古
如茲於今為烈維茲無棣夙號名區禹德疏河齊封表海后氏
著卅九詩傳莞子分十五士鄉是以家握靈蛇人誇繡虎熙甯
列榜二李聯雙萼之輝勝國留坊三柱表一門之盛強幣之未
不穿編願都人士共雪斯言良治之子必學裘况鄉先生餘風
未泯或彩纓擔爵噪績輿碑或解組懸車休神家術邦之彥也
侯其禕而本縣馬帳長依廿年提槩龍墀親試一命分符學敢

慶雲縣志

藝文志

撰述

三十一

謂乎明經深慙獮祭情尚殷於校藝竊喜豹窺茲擇於正月十
六日諸生童其筆硯親携坵壇爭長凡夫手叉才敏腹藁思沈
博則聚饋食之粮精則收拯亂之藥馬遶收疾各因乎性情宋
豔班香咸抒其藻績譬諸陶範異器並為入耳之娛黼黻殊形
俱是悅目之翫則是日也字裏起燭天之燄星階不待然燈行
間流擲地之聲月幔何須奏曲作者既心游而精驚觀者自眉
舞而色飛本縣將標旌茅之慮無黜壺慮之烏有送諸問字傳
經之舍給以焚膏繼晷之資從此月必課三期毋曠兩兔絲燕
麥誓必虛名鹿洞鵝湖追斯盛規將見執轡而兩驂如舞闕弓
而七札齊穿今年鷄存秋霄待振高飛之毛羽來歲鵬搏春海

行看直上乎扶搖聯轡而來尅期以待嘉慶十二年正月

重修王公祠堂記

教諭 趙試桂

蓋聞人生不為御史則為縣令以御史得言天下之疾苦而縣令得救一方之沈溺自漢以來稱循吏如倪寬尹翁歸黃霸龔遂諸名臣雖未皆俎豆千秋而載諸史鑑政績卓然至昭人耳目赫赫若前日事慶雲縣治東舊有王公祠考縣志所載與耆老所傳官印之窠字心一前萬歷年間由刑部謫令慶雲興教勸學課士如嚴師政平刑清保民如赤子邑南為九河下流頻年水患令民挑濬疏通其水雖有靈霖不傷禾稼貧民居四境布種地多荒蕪捐資買牛散給窮戶雖遇水患不困衣食而且

慶雲縣志

藝文志

撰述

三十二

勤求民隱清畏人知衙齋肅清服威在胥役諸弊釐剔徧德在羣黎數年後起為御史邑人感恩思慕爰立生祠崇禎二年時知縣何明府申准從祀迨後歷年久遠庭宇已掃地無餘殘碑僅存舊基復侵佔莫考邑諸生王端請於督藩府縣勘明故址重建祠堂自行捐資黜堊墻壁王公遺像宛然幸新慶邑人民得生而享其利歿永畏其神死長服其教者在此舉也抑不知王公為御史時其言天下之疾苦者何如而即蒞茲慶邑救一方之沈溺令黎民之安睹視古之循吏何以加茲馨香俎豆世紀不絕不亦宜乎嘉慶十四年歲次己巳六月之吉

新修慶雲縣學記

知縣 潘國詔

丙寅冬詔奉檄蒞任慶雲始至謁夫子廟牆壁破缺棟樑摧頽
堂階皆荒草彌滿蕪穢弗治欲新之未逮也其明年趙君某來
司鐸謂事之如迂而實急者弗可緩圖於余心若合一契焉乃
謀及多士輿論僉同於是審量日力籌度費用己巳孟春經始
崇聖祠遂萃工於文廟庭廡門墻各以次舉明倫有堂尊經有
閣聖茨黝堊悉改舊觀旁及祀典所載咸治新之八閱月而工
告成因諭諸生曰慶雲設學四百有餘載矣昔之始作廟者擇
良材堅甍而為之因歷年茲多風雨之所漂搖烏鼠之所穴巢
而完者以缺隆者以撓人心亦然仁義之良有生具足或拘於
氣或錮於習外誘日深性真日泯聲色貨利人心之風雨也嗜

慶雲縣志

藝文志

撰述

三十三

欲攻取人心之烏鼠也雖然革其舊祛其汙新之而已果能無
變厥初則向之破缺者今崛起而墉崇矣向之靡頽者今峴嶽
而枝挂矣向之蕪穢者今芟獲而被除矣夫豈以侈前人惟復
乎始作者之規模也人之治心也凜雪精神滌垢蕩瑕植基於
忠信宅躬於仁義而大成於禮樂踐聖人之跡而入於其室夫
豈有加毫末哉惟充其本然之善焉已耳而泯其性者顧日即
於淪亡而莫之省也可慨也夫今國家隆學校育人才歲取茂
才以為弟子董以師儒之官俾課其醇疵所以責儒敦厚風俗
也趙君勤於厥職以獎成士類為務諸生其祇服師言養成德
器毋徒誦六籍之文而剝其陳迹則教化之成可拱而竢矣趙

君曰是言也有碑於學者請刻石記之嘉慶十五年

觀風教

署知縣 張濟川 春
閩縣 帆

蓋聞風行地上易紀觀民歲在星終禮巡殷國觀風之典振古如斯方今聖天子誕廣福林洪開藝苑八元十會光分太乙之精東壁西園燦若景丁之貯巨丕天之大律盡荷裁成萃率土之羣英咸歸陶鑄庠分郡邑豈惟見驥一毛闡列春秋快親拔茅連茹愛乎尚矣侯其禕而顧造士賓賢誠天家之懿典而興文勸學亦令尹之分司欲伍耦而下車必入都而問俗慶雲縣者壤分紫甸境接青齊左右瀛滄股肱畿輔西山東岳總鍾英毓秀之區龍岡雁灘本韞玉懷珠之地望棗城煙雨無非學士

慶雲縣志

藝文志

撰述

二十四

詞壇觀杏岸曉雲悉是才人詩料開步桃花嶺上吟風而春到河陽極目臨津樓前翫月而珠還合浦所為產此名區類多傑士陰陽燮理李平章風節稜稜經術湛深李學士詞條井井讀張屯田燒磚一疏恩膏與江水同流矚胡方伯諭賦片言仁聞共閩山並永望典型之尚有詎今古而或分本縣籍分閩海派衍曲江世守縹湘十三世青搖燈壁代聯科甲十一代紅壓帽簷教子一經杏苑中叨陪春宴授徒四術桂殿裏親撥秋香所自愧者沐浴詩書之澤祇知鹿解食羊所不辭者出入風雅之林竊謂馬堪問道爰假小春佳日用摠大雅鴻裁燕寢風清正好凝香而想鶴廳夜永何妨燒燭而書與其兩兩三三携榼而

尋梅訪勝何如魚魚雅雅分牋而抽秘騁妍或追董賞之茂醇
或稱班馬之濃豔或學陰河之縝密或吐李杜之光芒三折肱
者定是良醫八义手者豈非才子本縣久廢嘯歌未敢拋磚引
玉多士日常吟咏幸每惜墨如金看此日七尺珊瑚爭投鐵網
卜他年一班玉笋齊上雲梯嘉慶十七年十月

重修歲甘橋記

邑進士官工
部員外郎

劉廣恕

邑城東門外臨津街南面河古高津也河故有橋舊名通濟類
廢已久自乾隆二十一年甘邑侯倡衆重修更恢擴之橋成問
於制府方公公以年豐而人樂於趨事且嘉其為善政也因寓
其姓於橋之名題曰歲甘並鐫諸石迄今六十餘年橋之墜壞

慶雲縣志

藝文志

謹述

三十五

者屢矣陽信有孫林者貿易寓慶殷然振作獨肩厥任前甘邑
侯製匾額以彰其名而都人士亦以善人公贈之數十年來相
繼補葺人不病涉者林力也迨嘉慶庚辰春河水暴發汎濫四
出岌乎柱折梁頽僉謂經營宜亟然鳩工庀材為費不貲矣邑
為遠近村落市集輻湊之區而輪蹄往來且為山左登萊青諸
府孔道尤不可以旦夕緩維時孫善人之孫殿衡克承前志倡
聲率先思舉於衆擎而成之不日也乃延同心協力者三十餘
人朝夕擘畫不惜其勞而一時好義樂施者亦莫不踴躍圖功
爭先伙助經始於道光元年二月十八日是夏五月十一日工
竣其購木石磚灰之料之富匠作工役之繁且多既固既堅終

始弗計費繕錢三千有餘歲甘橋故碑久斷字半殘缺幸得所藏榻本仍摹而刻之於石舊蹟一新是橋也竦而高且袤而長繞以朱欄望所彩虹誠勝概也自今伊始四境之內並鄰封鄉邑車徒往返以及商賈懋遷輩罔不履茲坦途視如周道欣然樂攸往之利抑何休與嘗謂工鉅費浩非強有力者為之倡而又鼓衆力以圖之而欲計工市材增其舊制俾規模宏壯聿觀厥成蓋其難哉既告葺鄉之人咸推首事者之功而又樂和衷集事者之克相與以有成也願勒貞珉以垂永久爰撮其巔末而為之記道光元年五月穀旦立石

送慶雲崔太守由鎮江之官松江序

元和舉人張肇辰

慶雲縣志

藝文志

謹述

三十六

道光二十二年秋江蘇大府以鎮江遭逆夷殘破綏輯匪易慎重持擇為地借人特奏請以簡放松江府知府博陵崔公權視鎮江越明年六月海警告靖民訖既息元氣漸甦始檄公回松江任時肇辰主郡之寶晉書院諸生來告曰公行有日我士民受綏輯之惠紆軫日久先生能為宣其意以誌戀私實幸甚既察諸生之意誠而公實有造於斯也遂不辭而為之叙曰江蘇漕賦居天下之半蘇江又居一省之半重郡也天子特以守命公公未至松而鎮人先私公惠幸也今還公於松大府初以權宜獲請不得久乞留理也鎮人戀戀去思而不能已情也其可無以述之乎先昨年六月逆夷內犯破鎮城蹂躪靡爛持兩月

久始退出江口而人民已死亡遷徙相半府縣官於時亦議代而郡居南北咽喉為過江重鎮沿江多私販盜劫出沒城遭破後民氣甚窮富者去而貧民益嗷然不能奉約束江渚洲田億萬畝頻歲沒波浪中其民日習强悍幸而有年得以靜謐此日鎮江之難為蓋如是公之至也招徠撫輯人戶漸歸而庫藏如洗善後事宜百凡籌畫支應維艱重以奸民利亂訛言時興民氣易驚風鶴滿耳如是者幾半年公不動聲色與民相安於無事而亦竟無事於虜鎮人之不見兵燹二百年矣一旦變出意外倉皇震駭受創實甚復之匪易國醫之療巨瘡也人不知痛而舊漬去新肌生以為是效之神而不知治之固有素定之方公

慶雲縣志

藝文志

讚述

三十七

之能消弭鎮城之有事為無事固亦知公之有其學也公以無標名闕承尊甫念堂先生庭訓文章經濟講習有原早歲以名進士出宰山右之鄉寧縣旋調陽曲洊升代州著有成績臺省交薦屢擢至此適以鎮江彫傷囂動二千石夙號幹材者大府皆不敢異特為鎮人借公果公至而民忘其亂今者還松其易於為治可知也諸生於是請曰公之所謂學先生其亦有可述乎則敬告之曰儒者之治異乎俗吏之為也久矣簿書錢穀治具也當世之求稱職者無不殫心畢力焉至乎文章氣節則以為儒生講習事無與於考成故自膺民社以上皆鮮克為意又朝夕困於簿書錢穀實亦靡暇以及鎮江書院之廢二年矣公

來院之經費已為寇劫去獨與縣大夫光州王明府慨然顧慮
曰士不可一日不學也士不學且益習為商賈行文章者所以
範其心而且冀習俗之厚也於是公謀於始縣大夫成於後而
書院得以復昨夏夷人入江京口調兵雲集獨青州兵四百登
城與逆接仗戰逾三時力竭殲焉公來弔國殤而涕漉漉墜亦
謀於縣大夫規地建青州忠烈祠蠲吉致祀並為文碑之以永
春秋嗟乎此非所以勵節義者哉嗟乎此二者可以知公之為
治矣士咸嚮學則不競於刀錐而名節自重人勸於忠義則婦
孺皆能激昂而成城之志可固文章氣節非治亂之具而其足
靖亂以培永治之基也如是是則所謂儒者之學俗吏固與於
乎是為叙

慶雲縣志

藝文志 藝述

山西蒲縣知縣舉人崔旭墓誌銘

湖北 巡撫 羅繞典

聲音之道與政通惟深於詩者能以溫柔敦厚發其不忍人之
心達諸政政成而其詩其人地可以不朽慶雲崔公念堂詩人
也宰蒲多善政余前守平陽與蒲接壤適公解組就養於正甫
同年所治之鄉寧維時蒲邑人誦公不衰而並賢正甫公既卒
之六年正甫以書來屬銘其墓謹按狀公諱旭字曉林號念堂

其先家山左徒直隸慶雲之隄口莊再遷城內遂世為慶雲人
高祖允貞歲貢生康熙中兩修邑乘學問淵博載府志曾祖若
琪庠生祖康熙乙酉武舉都司銜考大本增廣生累贈中憲大
夫中憲公生子三公其長也性穎悟八歲即能詩試屢冠軍督
學沈公初金公士松趙公佑亟賞之嘉慶庚申鄉舉出四川張
船山先生之門先生以漁洋門下士崔不雕目公並贈句有云
直勝崔黃葉一時都下傳為佳話道光丙戌大挑一等奉旨以
知縣分發山西署屯留下車禱雨立應聽斷勤明講學磨山書
院士民感服既補蒲縣令蒲為堯時蒲衣子舊壤水枯地瘠僻
在萬山中城垣監獄倉廩多傾圮書院久廢又時有霜災旱歉

慶雲縣志

藝文志

謹述

三十九

民俗剝悍攘奪蜂起夙稱難治公至減其供億陋規衆餘貲僱
貧民傭趨赴工諸廢具舉昕夕坐堂皇決獄曲盡情偽或兩造
各執一詞不遽咎責婉諭之心折氣平公退澣衣蔬食日手陳
編與一燈一硯相習軫念民間疾苦一於詩發之延師課邑中
士親校其文肯學使按試蒲苦文不敷額繼乃益額公之教也
後兼理大寧縣事勘災多實惠有鄉民糾衆強貸擒為首者置
之法風遂寢癸巳稱疾引退里民走送數十里羅拜泣下自非
溫柔敦厚之教能達其不忍人之心以深入人心不及此正甫
宰鄉寧距蒲百六十里公時以書敦勉後調陽曲牧代州特旨
發江蘇以知府用旋補松江時嘆夷陷鎮江公稱說大義促令

赴任適奏權鎮郡寇平辦理善後事悉稟庭訓公詩沈雄雋拔
不名一家嘗同梅樹君邊巨峯陳石生為詩社晚乃與選畿輔
詩傳并自選滄州詩鈔慶雲詩鈔所著有念堂詩話刊行念堂
文集村居雜憶念堂脞錄藏於家近陶鳧鳧鄉先生晚香唱和
集袁玉堂蠡莊詩話習靜軒筆記謝問山十家詩選梅樹君津
門詩鈔選公詩尤多手纂慶雲縣志謹嚴有體性果毅有大志
持躬介接物誠祖母病篤減額天事二親以孝聞課兩弟及三
子皆務為有用之學掌教古棣書院分校昔聞及門者多以文
章政事顯聚書及金石滿屋兼工分隸而於詩功力特深生平
遊歷如濟南代北淮揚白下金閶雲間東浙所閱山川名勝古

慶雲縣志

藝文志

謹述

四十

賢遺蹟輒感慨激昂見於詩晚年聰強健步丙午正月病喘因
先人膺封典命子弟改題木主事畢遂端坐而逝公生於乾隆
三十二年閏七月初八日卯時卒於道光二十六年正月三十
日酉時壽八十元配劉太恭人事舅姑稱孝繼配趙太恭人勤
儉持家教子女嚴明有法度前三歲卒壽七十有七合葬城南
先塋之右子三人長光第嘉慶己卯舉人署河南獲嘉縣知縣
劉太恭人出次光筭道光乙未學舉人現任故城縣教諭次光
笏道光壬午舉人已丑進士現任雲南儲糧道女一俱趙太恭
人出孫八人繼善綬善紱善福長祿長鐘善鑄銘善鑄善曾孫
一嘉平乃為銘曰 帝陞歌雲八伯伊始公以詩鳴屈宰蒲子

政平訟理偉哉詩史未締繡於日星乃謳歌於撫字慶雲流慶
分糾紛萬祀

劉母胡孺人節孝傳

邑舉人 崔光第

孺人姓胡氏為慶雲望族康熙癸酉科武舉諱璿公曾孫女康
熙癸巳科武舉江南興武衛千總候推守備諱永寧公孫女武
生諱斌公女例贈登仕郎聿修劉公諱長榮賢匹也生而明慧
幼失恃事繼母惟謹翁姑聞而憐之年十四即賦于歸入門先
意承志克盡婦道凡翁姑所欲為若預知者翁姑嘉悅之內外
皆贊其孝無間言未幾翁炳若公赴伯翁曦若公昌邑任所聿
修公隨侍讀書孺人奉姑王太孺人在家時值匱乏食粗糲或

慶雲縣志

藝文志

誦述

四十一

終日得一飽安之若素親串中有慶吊事姑親往或日暮不至
孺人挑燈縫紉以待庭院闐寂無懼心亦無倦意後數年聿修
公隨炳若公歸里家計漸裕晝夜以女紅佐讀聿修公
或不悅孺人容色和愉婉為排解俟怒息而止生一子一女孺
人年二十三聿修公歿一痛欲絕誓與俱死所親以翁姑在堂
喻以大義孺人忍淚吞聲慨然以孝親撫孤為己任女早孺子
瘞既束髮延師讀書督之甚嚴塾中早暮出入雖風雨必以其
時及成人授室孺人率子婦奉事雙親儼如姊妹以後數年翁炳
若公遺疾自夏涉冬孺人侍湯藥調飲食無須臾稍解炳若公
垂危泣謂戚族曰此真節孝雙全異日必請旌表我死亦瞑目

矣戚族皆為感泣既遭喪盡哀盡禮是時家計稍促孺人紡績為業早起晏眠至鷄三號不休如是者數年米鹽賴以寬裕長孫希愈早失乳撫之如子生痘疹和衣而卧者數月及長入塾每昧爽即促之起媳蘇氏病歿仲孫希洵尚幼孺人又撫之如撫長孫焉未幾姑王太孺人病卧床二年飲食必進所嗜衾簟必潔淨晝夜轉側數次親為扶掖姑每語人曰我雖久病不覺床蓐之苦者孝婦之力也姑既歿哀痛如翁歿時喪葬後歲時伏臘及翁姑諱日蠲潔祭祀必誠必敬數十年如一日論者以為難子璵體羸應童試不售旋即廢學孺人每憂形於色勸諭諸孫讀書尤切孫希愈早食廩餼有聲庠序希固亦相繼入學

慶雲縣志

藝文志

誦述

四十二

行將科目繩承皆孺人之教也癸巳滄州同族夫弟前戶部郎中今衢州守丁佩公循例籲請奉旨旌表節孝孺人悲喜交集喜不負翁之遺囑悲已之養親撫孤數十年備嘗艱苦也孺人仁恕慈祥出於天性戚族有喪匍匐往救男婚女嫁無不力為經營三黨饋問必周凡有慶吊事他人或遺忘孺人獨能記憶戚族子弟視如一家有貧乏者時時周以衣食俾得上進其官達而思報德者蓋指不勝屈也量寬大不與人較有以非禮來者仍以禮往嘗戒子孫曰世間若報施太分明不將終不相往來耶又曰處世慎毋爭我甘讓人人縱笑為懦弱然所全多矣因舉他家所以興敗者以為鑒以故子若孫恪守家法外侮不

至接下有恩婢媪疾病躬自撫視過乞丐甚厚有誤以不潔食者追及門外奪而覆之其人驚愕為具言所以感謝而去飼雞犬必親視曰物待食於人人饑渴能言物饑渴誰知其仁厚及物率如此一生勤儉自持紡績縫紉雖抱病不少休飲食甘澹泊偶具兼味必徧分於人有餘始自食居家弗尚華飾膏服補綻之衣不苟言笑而心平氣和從容中禮人無富貴貧賤待之如一凡與孺人見者莫不退而嘆其有母儀焉孺人得天者厚氣體素健當瘟疫盛行時戶無得脫孺人獨不染癸卯夏偶因失足致疾至甲辰三月歿歿之前戚族問疾者日輒數十人歿之後往弔者皆欷歔泣下嘖嘖稱賢焉嗚呼非孺人盛德感人

慶雲縣志

藝文志

譚述

四十三

烏能致此哉生於乾隆三十九年二月十七日酉時卒於道光二十四年三月二十二日申時年七十一歲子懋議叙從九品孫男四長希愈廩膳生次希洵業儒次希固庠生次希甫業儒曾孫一鏞曾孫女三皆幼今卜吉戊申三月初二日啟聿修公壙合葬於胡蘇河畔先塋之右子懋泣述孺人之懿行而乞光第一言不敢以不文辭也謹傳孺人之生平如此贊曰孺人於光第為舅母光第幼失恃孺人撫愛甚至故知孺人甚詳孺人素未通書而自幼至老動合於道劉向之傳班昭之誠其所稱曷有加焉自古以苦節傳者不少而天性賢淑至誠動物如孺人者蓋不多見有採風者可以觀矣

觀風教

知縣 賀祥麟

昭得天開紫極京師稱首善之區地控黃圖畿輔踞上游之勝
堯琴舜瑟調成萬鄰笙鏞夏鼎殷盤釀作千庠俎豆皇風煦被
聖日昌明榮光普燭乎朱垠粉濟何遺於赤縣屬有樂陵故壤
溟渤偏淑雖云北限彈丸亦復躔分析木溯流河於禹跡水注
高津稽賜履於齊封疆分無棣營開冶劍朱光騰玉虎之精亭
敞觀瀾碧漲擁金鰲之浪南渡三橋而赴濟北杭一葦以通蘇
陳克佐築有長隄淮陰侯挂餘古甲當頭鏡影好看明月沽中
照眼奎光試認文星台上既鐘靈於五壘爰啟秀於羣村則有
偉績平苗甄尚書褒榮玉劍深恩化俗趙大令勸課桑麻郎中

慶雲縣志

藝文志

謹述

四十四

督吳郡之磚民刊德政轉運發蜀都之米帝鑒忠忱金爵銀壺
胡敬夫懋酬庸之典秦山北斗王學博留抱道之型李端叔見
聘於東坡楊月川共稱為靖節忍菴策勲於判簿周卿表節於
歸田義門同數世之居德範樹一流之品迄我朝家傳詩鉢戶
下書帷或純孝旌廬或昭忠入祀或以古香標集或以恭毅易
名或神童負草聖之能或理學推儒宗之望類皆焜煌閭史烜
耀乘書業徵叢詰之鴻騫應見時髦之鵲起灘稱落雁會留題
雁之名罔號卧龍當擅雕龍之筆大雅之才麗以則盛世之音
和且平本縣有經脫白叨廁徵黃肯館篆於高平茲分符於保
順錢空鶴背一葉為裝卷束牛腰千篇入載衙琴奏罷慣披螢

業遺經訟牘書成時理免園舊冊宦情有澹文興猶濃方當入境觀民遂開文場選佛為此特行曉示定期九月初十日齊集生童局試碧萸釀酒非朝宴過遊山丹桂探香今日天開放榜良辰莫負雅會堪聯所冀青藜學士紅杏詞人花智慧以分開草文章而競放吟篇元白制藝歸黃譙啟論文待試何郎之餅科分異等還酬孫氏之錢逝肯來遊其有所試此日花城小集同櫛倚馬之才他時蕊標榜連標共附登龍之路本縣於諸生童有厚望焉道光二十九年九月初三日

湘帆詩草序

知縣桂山香南

慶邑劉茂才小韓舊家子也性孤介恥干謁束修自愛有古名

慶雲縣志

藝文志

謹述

四十五

士風丁巳春余奉檄宰斯邑即耳其名君高節未嘗一至余室余亦重其行未嘗輕於請謁相於神交而已友人莊藹人性情坦真與君交最善以君所集慎餘堂詩鈔見示余題贈古風一首以誌傾慕益知君非俗下士可比茲復出其所著湘帆詩草乞藹人點定索序於余嗚呼凡物不平則鳴以君之握瑜懷瑾使得早掇青紫和其聲以鳴國家之盛詎不足為太平潤色今乃投閒置散僅於高津河上嘲弄風月以發其不平之鳴誠未知造物者意竟何如然君年雖長而未至於髦又焉知非天欲老其才以為世用故有盤根錯節之為歟否則文章憎命少達多窮而留此一編使後之好古深思之士於無棣城中緬想流

風餘韻將有不得於彼必有得於此者君亦可以無憾焉爾

觀風教

知縣黃仲畬東私

為考俗觀風倡會課以興文教事照得本縣履任兩月自愧德教之薄未足以興起吾民而遍歷村鄉見夫女織男耕里閭樂業茹貧食澹儉朴成風知此力農學圃之中必有執卷橫經之士迨接賂紳耆詢及邑中甲第則稱上朔昔年燕榜科名蟬聯鵲起而近茲二十載文場旗鼓鴈渺魚潛嘆閱之匪遙惜箕裘之未繼不禁為之怦然動念欲振起鼓舞稍復前規而簿書鞅掌案牘勞形近幸秋穫告成一切緝盜安良政令次第修舉始邀集兩學寅友同詣古棣書院見夫門庭瀟灑院宇虛閒生

慶雲縣志

藝文志 謹述

四十六

童數人絃誦未輟詢以膏火咸稱缺如簡陋相沿振興不易本縣自維使一日居職而政教不修則五夜自思亦覺惛懷未愜為此布告遍諭定期觀風備文移學傳知闔邑生童於本月初十日齊集書院領題受卷各盡所長本縣親為評閱分別等次酌加獎賞仍於院中每月定期會課二次經費膏火悉由本縣捐廉發給端士俗而正人心勵廉隅而敦實學於此實深厚望也本縣一命綰符始權慶邑而三世作宰皆在畿南誦古至聖之名書亦知愛人學道佩先大夫之遺訓惟有重士勸農迨披閱卷乘嘉慶十七年壬申十月有署任閩海張邑侯 濟川 觀風教一篇載在簡冊珠玉在前文采煥發而是年是月實本縣攬

揆之辰忽忽五十一年重興此舉迨迨八千餘里復起斯人雖
云歲月之偶符終是根源之可溯意者前修後果萃此邦香火
因緣故令步武芳型續當日藝林佳話生童等生茲名邑豈乏
翹材其為詩禮簪紱之門必有羸金饌玉即在草茅特達之士
亦多懷寶菁華芝草無根人亦貴夫自亦蘭香可負士豈患夫
長貧際此佳日秋成小春月吉龍崗秀峙狀文筆之雄奇雁淑
波澄寫詞瀾之壯濶棗城烟靄羣推作賦之才杏岸雲深豈少
眈吟之彥運斤技熟裝成七寶樓臺抒藻先成負去五花繡筆
研經洗髓荀爽業本名家說詩解頤匡鼎來應奪席勗哉多士
勉矣矜修勿負本縣殷拳雅約之意同治元年十月初七日

慶雲縣志

藝文志

撰述

四十七

觀風教

知縣 楊承杰 仲椒

竊聞為政貴於得人求治宜禮先士良以文章道德本一根源
禮樂兵刑相為表裏欽惟我國家旁求俊乂幾於遍及遐陬爾
多士闡發幽思咸願共登廊廟矧慶邑壤分紫甸界接青齊危
星耀奎壁之光山水毓瀛津之秀瞻雲誌慶沐聖澤以涵濡映
雪功勤見人文之蔚起稽夫宏詞相業李子晦之敗敵敵席賓
主為歎政事文章李端伯之典則高文弟兄濟美重農興學德
輝功偉平苗蕩寇安民敬夫譽高朝野若乃楊月川之澹泊宗
錦裒之沈潛陳忍菴則坦逸勤明崔莊伯尤剛毅厚重抑或擁
臯講座唳鶴華亭秉鐸鳴琴莫不風清滿袖抱經從政大都朗

月虛懷代有聞人類多高士孰非貫通今古啟佑來茲者哉本縣徒虛江左人文忝捧畿南憲檄自愧肯郎嘆與長卿而同病尤慚俗吏願求益友之良箴私幸幼承家訓尚非目不識丁若謂好為人師真使顏厚於甲方今急務先宜偃武以修文際此時艱尤貴尊賢而尚德是以擇吉於十一月十八日觀風課士合先出示曉諭為此示仰閭邑諸生童知悉其願與考者務先期三日赴禮房報名以便預備課卷是日黎明齊集書院聽候親點授題封門局試爾士子懷才待聘恐後奪標早足三冬之學務盡一日之長雕龍之心細於髮咳唾珠成造鳳之手大如因指揮花發本縣先薰薇露結問字之因緣細熟蘭膏快奇文

慶雲縣志

藝文志

謹述

四十八

之欣賞謬評甲乙妾廁丹黃薄捐鶴俸以為潤筆之儀敢謂羊修聊代安車之聘庶使璧珍和氏不教空手於寶山使教紙貴洛陽亦足愜心於陋室少長畢至多士咸知毋得觀望致誤特示同治九年閏十月十八日

黃徵君墓碑采記

正陽縣志

邑舉人正陽縣知縣

解忻

古之所稱不朽者立德立功立言非是則無得而稱焉者也故士貴修名之立其有德未生民之被功未社稷之施當時亦具有韶音令旨之可挹要未嘗託竹素成一家言足以藏名山而播文采於後世而接其光曜通國傾心流連至彌日信宿灑然俾鄙吝之盡祛厯載千有餘荒林林土中猶煜煜騰生氣令人

俎豆之不祧嗚呼此其德器必有度越尋常者矣汝南黃公叔度其生平行事逸於史策而一時士論翕然方諸顏子擬古賢非輕擬孔門諸賢尤非輕擬顏子哉顧予謂世降自春秋先後公擬顏子者猶有三人其卒攀乎顏子與否則學之至不至殊焉戰國時有樂正子中乎信善鄒嶧升堂者祇一人程明道起北宋物相亦平心降氣與周旋而城南課童子天機盡泯沒猶使人欲聞其名而追贈之則歸季思實超然於有明士大夫中與公之克遠黨禍不峭激以取戾不放達以鳴高落落輝映於宇宙間暄然而和氣至蔚然而慶雲生擬諸簞瓢陋巷之梗概夫豈不於其倫哉余以庚午夏來尹正陽正黃君故里也邑

慶雲縣志

藝文志

譚述

四十九

治之偏墓在馬祠堂傾圮思新之乃與二三君子謀事遂集眾欲得予一言紀之石予維公之得自成其不朽者遠矣非予名言之所得而藻繪之也予檢閱邑乘載王守溪所為天祿閣外史叙一篇外史予嘗見於叢書及諸史之中心頗疑之守溪之叙謂或出於晉世之隱君子向亦意其然近見應雷徐氏著叔度二誤辨云外史出明嘉靖末崑山王舜華逢年手徐猶逮見其人夫以公之屢辭徵辟而以今日賓魯明日賓齊澆之不足濁千頃之波然恐世有不見徐氏之書而疑於外史之所述不可以不辨且守溪之叙作於嘉靖二年而是書出於嘉靖末守溪成化十一年進士卒年七十有五至嘉靖末當百餘歲又孰

能起已朽之骨而為之叙乎則不慎外史誤即守溪叙亦贗也故并識之以俟後之君子參覽焉

野雲子傳

徐圭璋

先生姓郝名君佑字啟人余妻黨別丈也雅潔自喜而不詭於俗頗工書畫有逸氣常把麈尾帶胡蘆以寄意余初見之驚且疑徐而探其故則先生功過格也聊倣古人紅黑點之意誌而納之胡蘆歲月時省焉嘗自歎曰吾自帶胡蘆以來期以寡過而終未能寡甚矣難也鄉人雅之以為仙焉以為禪焉而不知其為之有道者也性嗜山水談盤山五臺岱華蓬萊之奇輒欲襍被以往數遊濟南名山一日於青齊道上見有氣自地中起

慶雲縣志

藝文志

護述

五

者昭如烟縷繼如蛟龍盤旋直上繚繞天際時正午萬里無雲翳徘徊踰刻而滅因浩然長歎曰此其天地之精氣乎鬼神之流魄乎帝王之瑞徵乎將士之猛氣乎國家太平幾二百年四方無征戰豈善氣乎負氣乎降人氣乎抑野雲之變滅幻化如名火電光之出沒隱見乎無以名之而歸之於吾因自號野雲子野雲子既有所得胡蘆之格益嚴行益潔心益清鄉里之訝者愈以欽敬至有長跪以求其解紛者野雲子到便解雖非其所樂然猶勉強為之獨念野雲子以早年補諸生才氣清逸高邁使挾以進取以博人間富若貴一旦可唾手得竟棄不顧此豈非古之有道者歟噫余窮於世久矣浮沈逐逐幾不可問每

見野雲子則鄙吝頓消超然有出世想豈所謂黃叔度之風耶
吾聞野雲子好誦古今我愛陶元亮鄉里人稱馬少游二語可
以想其風流矣嗚呼為之贊曰

高山峭峭流水深深清風超詣邈焉絕塵先生之押一片野
心先生之贊今之古人

無事小神仙傳

王岫雲

先生何許人也少好學博古善草書工水墨壯遊山水頗有林
泉之趣是蓋道學人也神仙之名何自來乎先生自言曰塵世
之人無事者鮮余獨習為懶散入則據梧靜坐出則曳杖閒遊
任意逍遙聊無所事因自號以寄意焉客又曰神仙而曰小者

慶雲縣志

藝文志

譔述

十一

何也先生復自解曰神仙遺世岩棲谷飲採藥煉丹奉真朝斗
丹成果就乃成大羅事亦苦矣余揣未能雖有出世超塵之想
而未脫塵緣故以小別之偶解無事之嘲耳客歛衣就坐退而
自思者三日歷閱古今名流或浪寄江湖或甘心泉石多以無
事自高先生不屑也他日再造先生之廬因見奇石怪松迥非
凡境名花異草別有洞天且壘塊為山團花作佛是有真機近
於遊戲時而有業也俯拾即是著手成春先生暇甚而其為文
也不著一字盡得風流先生逸甚小園日涉成趣非靜者不能
得其機非化者未能通其妙自是君身有仙骨乎恍然遇之未
識其真彷彿其似為之贊曰孤標落落松栢心耶秀骨珊珊梅

花品耶清風朗朗緱山鶴耶逸致飄飄華頂雲耶仙乎仙乎其
斯為先生之高乎抑其為無事之樂乎先生笑而不答第聞泉
聲冷然檐鈴皆響神仙之趣仍當問之先生可乎

大蘇灣莊重修金斗橋碑記

夫事以有造於累世而傳功以有濟於衆人為大先王疆理天
下成梁除道載在教典誠以土杠輿梁固一方所必需實四方
所共由也慶雲縣東北距城二十里臨鎮高津舊有二橋東曰
金斗西曰銀斗相去百餘步中間一夾陵隔之西北滄鹽東南
海霑往來通衢也故二橋命名之義據鄉之父老云昔有善人
施金至斗建此二橋故曰金斗銀斗以誌善舉焉雖姓字不傳

慶雲縣志

藝文志

謹述

五十二

而數世賴之經此橋者相與追述軼事至今稱道弗衰其事傳
即其人傳也及光緒十三年疏濬高津以洩運河水勢銀斗橋
臨鎮支流僅可無患而金斗橋當河流之衝有岌岌難支之勢
保董何正居恐其漸就傾頽道路不通因倡義重修會集本莊
村正副劉印甫王者臣等共議籌款募捐成再造之功而四方
善人義士亦努力同心樂於贊成或輸捐助之資或効指臂之
勞鉅款蜂擁衆工雲集不日而長虹高跨當時行人過客僉謂
天佑成功即擬以靈臺靈沼無多讓焉至光緒二十三年春銀
斗橋復圯又共為修補庀材鳩工成功亦速向瞻洲泮於怒濤
共憂徒涉今真橋梁如盤石無勞褰裳四鄉之人咸諒首事勞

心於公益且感同事者相與有成而索記於予予雖不獲襄此善舉而見此履道坦坦知橋工告竣諸君濟人之願既償舟楫無庸行人病涉之苦亦免故喜為後之君子道之俾觀於此者皆生輕財好義之心庶幾相繼修葺永永千秋也於是乎書

重修歲甘橋碑亭記

劉鴻達

慶邑東門外跨高津而南者曰歲甘橋橋畔有豐碑屹峙因碑為亭其中可容數人逵嘗與邑人遊憩其間顧名思義以為有歐陽文忠公豐樂亭遺意蓋亭則借名於滁山橋則寓姓於邑侯其制一也按此橋為山左登萊青三府通衢前直督方敏恪公改通濟而為歲甘遂以名焉至建橋本末有逵伯祖可亭公

慶雲縣志

藝文志

撰述

五十三

撰文以紀其事閱時既久橋將傾圮碑亦剝蝕每當夕陽晚眺觸景感懷為惻然者久之去秋歲在庚子適文忠公嫡嗣辰堂明府以名進士來宰斯邑下車之始地方騷然羣小蠢動逾年辛丑暮春之初患亂既平政通人和四境安堵而高津一帶正桃花浪湧之時非經集腋為成裘之舉將何以善其後我公乃首捐鶴俸率官紳商民以董其成有敏恪公後裔名杰者隨任以助之凡橋之坍塌者以資修築碑之剝落者以塗丹雘不旬日而歲事焉復欣然與邑人往遊其間並過斯橋者咸頌德歌功俾恩澤永垂於不朽則以為復敏恪公之舊制也可以為仿文忠公之遺跡也亦無不可工既竣執事者請為文以誌之逵

因繼可亭公而為之記昔光緒二十七年孟夏穀旦

重修慶雲縣城碑記

邑知吳國棟

今之慶雲古之無棣也其地則燕魯相錯畿輔邊陲城池之廢興實有所關係也蓋東近海濱北控帝都海氛時警萑苻嘯聚雖為偏僻一隅誠亦北門鎖鑰也甲申夏余捧檄來宰斯邑津沽寅僚咸稱難治及下車後四望煙村稠密雲樹蒼茫且喜歲熟民安藉藏予拙惟見雉堞傾圮濠若平原詢知同治七年遭捻逆之變黎民殉難者不可以數計而是歲適有兩寇之警一旦有事何以保衛生民守吾疆圉觸目警心實為吾憂當此餉源不濟斷難請帑舉辦於是邀集邑紳商議重修初慮土瘠民

慶雲縣志

藝文志

護述

五十四

貧艱於成事乃一經倡捐眾皆樂從期未兼旬即輸將三萬六千有奇集民夫近八千人噫斯民之急公好義就有過於此者抑愛予之深乎遂與同城諸君互相參議晰立條約各專其事區別勤惰示以勸懲並請於合肥李相國給獎鼓勵以成大功相國亦深嘉許之卜於九月二十五日鳩工興築民甚踴躍而邑紳則量才器使分司其事或掌理度支或操辦工料或監查民夫賴協力於眾紳不假手於胥吏並設局城隍廟中每五日將出入款項懸榜示眾以期共見共聞實事求是也其民夫日給升米以補其力之不逮並分段工作即以鄉長父兄約束民夫子弟此猶身之使臂臂之使指也旋以天寒土凍暫行停工

迨至今正復為續興又恐有違農時特令減夫一半而鄉民或慮疲憊自相更易其間雖經裁減仍不啻八千人之工作也余每遊巡見負者鋤者畚土者舉杵者莫不爭相奮勉甚有先畢者尚肯樂幫未完之工而紳士等亦不辭勞瘁始終無倦至於炮台濠牆悉遵舊志凡四閱月而事竣焉嗚呼富者出貲貧者出力共相好義衆志成城豈特為一邑之保障而於全畿亦不為無助甚堪嘉哉但人或言彈丸瘠區未必為逆夷之所睨視奚必急急於此而甚於憂耶吾獨曰不然似宜未雨綢繆不可臨渴掘井矧范文正公云先天下之憂而憂後天下之樂而樂余雖不敢有望於先儒而心向往之矣伏願後之宰斯邑者

慶雲縣志

藝文志

謹述

五十五

念一撮之土悉是民膏勿任風雨剝蝕善為護持缺者補之殘者修之以垂永久而固全湯是則余之所厚望也夫是為記其在事捐資出力姓氏并度支條目及留存歲修經費俱載碑陰以備稽考焉光緒十一年乙酉夏日立

鳳城縣人民紀中將馬君龍潭德政碑

鳳城為奉天東南之屏蔽自庚子甲辰疊遭兵燹盜賊蓬起吾儕苦此離久矣辛丑歲匪酋林七糾黨數千盤踞縣城我公奉檄率隊進剿連戰皆捷匪勢蹙乞降東邊肅清此我公大有造於吾邑之初而商民之感戴遂於是始焉己酉春統轄右軍來駐吾邑牙蠹初臨既以除暴安良為要圖數年以來幾於有賊

必獲無案不破治兵則威愛兼施將士皆恪守紀律力除從前積習兵民相安各無猜忌非我公之教育有素何克臻此公與縣知事朱公翊周尤相得遇事和衷共濟於地方一切公益慈善之舉無不極力贊成而襄助之然不遇盤根錯節不足以顯利器我公之支柱危局轉禍為福為吾儕受賜最多感激無既者莫如革命時期當是時各省響應海內鼎沸豪傑有為之士固皆奔走號呼思欲建立奇功而不逞之徒假革命為名布圖擾害治安者所在皆有吾邑當衝波激浪之中大局岌岌不可終日公毅然以保衛治安為宗旨誠以奉省處特別地位吾邑亦然故惟出以鎮定有敢假託革命擾亂地方者立予捕治商

慶雲縣志

藝文志

護述

五十六

民乃得以安堵當其時淺識之士或不無間言迨大局既定事後追思及歎我公之卓識超越尋常不啻什佰仟萬而吾儕之性命財產得保無恙以至於今日者皆我公之賜也本年南省亂起奸黨到處煽惑前之偽託革命倖逃法網者不思匿跡窮鄉復欲乘機破壞甘心從逆我公捕其黨羽皆置之於法陰謀遂不得逞此其彌亂於無形而為吾邑造福者尤非淺鮮公殆為奉天東南之保障非吾儕一身一家之所得而私而吾儕既已屢受其賜又惡可忘諸用特勒諸貞珉昭垂來茲雖不足以為公榮亦聊以誌吾儕感戴之忱云爾既略舉事實復為之頌曰時局瀕危公其維之獨伸謀斷弗避嫌疑真我終身去我蠹

賊勇以成仁羣食其利鳳山常峙鴨水常流公之功德同此千秋
民國二年立

詩歌

晚泊無棣溝

劉長卿唐

無棣何年邑長城作楚關河通星宿海雲近馬谷山僧寺白雲
外人家綠渚間晚來潮正滿處處落帆還

述懷

李愚

奉職常如履薄冰屢看斜日下觚棱鹽梅且讓當朝傑粥飯甘
為退院僧虛負紫宸恩寵渥自傷白髮病侵凌明年便向燕南
去竹塢雲菴獨枕肱

慶雲縣志

藝文志 詩歌

五十七

有懷無棣李端伯三首

王從之宋

幼歲求真契中年得偉人傾懷當一面投分許終身燈火談元
夜鶯花逐勝春何時重一笑胸次欲生塵

其二

面目三年隔音傳萬里遙宦途俱蹭蹬人事各蕭條志大謀常
拙身孤道亦消本無當世用隱處會相招

其三

雋氣傾天下高情到古今銜杯曼卿放下筆老坡神時論誰優
劣人材自屈伸窮愁須理遣不必淚沾巾

送李端叔從辟中山

秦觀

人畏朔風聲我聞獨寬懷豈不知凜冽為自中山來端叔天下
士淹留蹇無成去從中山辟良亦慰平生與君英妙時俠氣上
參天孰云行半百身世各茫然當時兒戲念今日已灰死著書
如結菴聊以忘憂耳駸駸歲邁盡淮海歸無期功名良獨難雖
成定奚為念君遠行役中夜憂反側攬衣起成章贈以當馬策

真味堂

李之純

印景

陸游

慶雲縣志

藝文志 詩歌

五八

齊州山水窟登眺有佳處秋葉海東船春薺高灘樹

登古河隄

薩都刺 元

迢迢古河隄隱隱若城勢古來黃河流而今作耕地都邑變通
津滄海化為塵隄長燕麥秀不見築隄人

送講僧靜明復住持天宮寺

江西 陶安

靜明復毓秀乎儒族胡乃膜拜緇其服終日繙經坐空谷君不
見龍飛鳳舞下天目煙草淒涼渺平陸江南玉樹寂無聲喜見
曇花豔西竺月影相隨湖上宿曉玩雲樓衆山綠苑鹿晝馴巖
虎伏飯飽青精蔭脩竹空外一聲清唳響寶牀演法毫光燭蓮
香飛出牙齒間天雨滂沱散珠玉聞道天宮現人世蒼鷲回環

梵王屋一朝教省檄書來主領名山起幽獨釋子遙聞大歡喜
仰待雲間錫飛速從今禮師如禮佛丈室天龍來眷屬但令宗
說兩通融選佛場中一燈續

天宮寺鐘聲 唐太和賜額

訓導江
甯人 貝春

寺額猶題舊賜名疎鐘昏曉度重城何年鼓鑄成追蠡千載撞
敲訝吼鯨窗月欲來僧入定海天將曙客趨程幾回孤館驚鄉
夢疑是楓橋夜半聲

胡蘇煙草

景州 陳璉

河流分九派疏鑿自神禹胡蘇乃其一久涸積沙土今看成桑
田已可種稷黍獨憐芳草生萋萋暗陰雨

慶雲縣志

藝文志

詩歌

五十九

送張憲長歸慶雲

王元正

嗟君尚黑頭廊廟可立致胡挂獬多冠而斂珊瑚器放棹東海
東欲求丹砂餌三島咫尺間窟有十州記倘逢浮邱翁殷勤道
予意青精飯可餐一簞遠煩寄

檢災題壁

知縣 姚繼先

幾番走馬踏荒萊人目傷心盡可哀點地柳花爭似雪遮天雲
氣反成霾破村人去無烟火膏土誰耕盡草萊為寄廟堂憂國
者漫將兩稅苦相催

過黃花村

鹽山
進士 楊文卿 鷗海

海上青山挂落霞征車漸近野人家偶然過眼驚黃色十里風

吹苦賞花

挂甲舊壘

邑恩 楊粹夫 月 貢生

淮陰曾建定齊勳此地猶傳昔駐軍
身胄懸時光映漢鎮衣挂處冷屯雲
長川尚識旌旗影廢壘已無刁斗聞
回首天涯無限恨寒鴉棲處暮林曛

簡水漁舟

邑恩 楊州鶴 友 貢生 松

長河東去浩無涯秋後潛鱗味轉奢
滿棹月明漁父至一川風細釣船斜
解衣沽酒歌桃葉乞火烹魚烘葦花
惟有山樵與牧子時來相對話鷗沙

高津散步

慶雲縣志

藝文志 詩歌

六十

散步高津上遙林一聽鶯
晚霞連岸鎖春草破泥生水淺魚吹浪
沙深鶯作聲蕭然漁唱起幽興許誰盟

登長城嶺望頗河灘

一上荒城眼界賒寒雲衰草浩無涯
河邊水落羣灘小天外風高一雁斜
紅減野棠驚落葉白殘渚葦正飛花
明時却喜無他事日向煙波理釣槎

夜讌觀瀾樓

地迴樓空水氣涼斗杓插地夜初央
古今不改山川秀宇宙能容我輩狂
四座煙霞侵袂履一天星月印文章
廣寒此去無多地便欲乘槎到上方

地藏寺

坐久空門興倍清沈沈法鼓兩三聲老槐綴子翻新雨蒼麥開
花趁晚晴邂逅偶聞松下語依稀不似世間情從今我欲閒來
往惠遠無勞遠送迎

過無棣故城

不見當年丁令威纍纍高郭帶斜暉春深廢堞妖狐走秋暮平
壕野雉飛百畝桑田更舊主幾家村落閉新扉西風禾黍郊原
外多少寒鴉接翅歸

高岸古樹

盧元培清

半畝清陰俯碧川滄桑歷盡勢參天繁枝自抱風雲色貞幹寧

慶雲縣志

藝文志 詩歌

六一

辭冰雪緣高士結廬容嘯傲將軍屏坐寄流連聯珠而後知盈
篋絕勝南華第一篇

卧龍岡

胡惟一貞

一聲破壁向天門神物泥塗怪此存莫是河流防蟻潰幻成岡
勢鎮鯨吞風吹萍葉麟甲動浪擁桃花煙霧屯休笑埋頭盤古
卧時來霖雨滿乾坤

南皋遺筆

冰心鐵面鬼神驚抗疏江陵想大名攬轡何年來古刹傳燈三
教撤疑城龍蛇猶帶風霜氣宇宙高懸星日明最是漢庭疏賈
誼塵揮白鹿了平生

王比部祠

椎來博浪日邊寒想像明公幾墮冠欲為朝廷扶國本敢將心
胆脫神奸青宮無恙孤忠盡白馬誰辭璫禍難贏得桐鄉還愛
惜荒祠片碣淚漫漫

通橋春霽

邑拔貢生 陳士雅

宿雨微銷郭外塵通橋花柳不勝春漫言二水經流遠試看長
天霽景新當麓遊絲縈古刹隔林啼鳥喚行人風光堪醉還堪
咏岩壑非甘慕隱淪

遊慶城寄青園

趙澄

近市園能曠清樽對野煙鳥吟松石裏人醉水雲邊溪靜魚同

慶雲縣志

藝文志

詩歌

六十二

樂沙閒鷗欲眠蘭亭千古事幽賞企高賢

其二

坐起頻移席歌清興轉新松聲飄水檻月影度花茵詞賦人空
老江山我輩真露華涼午夜潦倒為情親

陳瀛海曹南大校四首

歸德侯 恂

肅清氛祲是何年梁苑重城漢壘懸英略已知潛九地膚功應
見勒中天

閩外雄圖更總師新從細柳見威儀深宮近說思頗牧會傍山
河勒誓辭

詩書元帥新開府弓矢前驅舊送輪一自冠軍推陷後兩河共

作太平人

將軍開宴賦彤弓夏屋綺筵湛露風海甸無虞傳盛事千秋長
劍倚空伺

微雨登慶邑南城

鹽山進士趙炯鶴

紙帳東來近海天選遊披雨到城巔雲翻橋面驚龍鬪坡枕河
腰認虎眠高水派分銀漢遠烏山名並玉峯懸乾坤多少狂吟
客千古登臨興未偏

雨後同友人再登慶城眺津河

每逢雨過便登高滾滾河流作海濤樹老槎枒依古岸霞明蕩
漾撼城皋憐他亂渡人聲咽助我狂呼詩興豪何處神仙吹鐵

慶雲縣志

藝文志

詩歌

六十三

笛龍吟水底傲吾曹

慶雲八景

邑諸生劉元宰

平空畫意展雲端此地猶然入大觀掩映荒城蒼色裏淋淋蓑

牧費盤桓 棗城煙雨

遠城濤色捲層樓縱我閒情任去留貪釣忘却歸棹晚滿河星

斗架漁舟 高河夜泊

萬里奔濤擁巨流翻身一轉枕河洲霞光蕩漾龍麟見紫氣峻

增日影浮 龍岡晴嵐

說向此灘雁已征好將閒意會漁情乾坤幾處逼人老獨占沙

洲送數聲 雁灘漁歌

古刹疏鐘向曉催
聲聲敲斷苦塵埃
等閒聽到無心處
寂寞繁華兩不猜
東嶽晨鐘

模糊山氣暗城標
帶月梅花雲外飄
一曲幽歌吹不住
發人清况夢魂銷
西山暮笛

隔岸深林染絳紗
烏鴉散盡賦朝霞
遊人多少翩翩興
微愜春雲遮杏花
杏岸晚雲

蕩漾清光徹夜明
環波載酒足陶情
千年愛月青蓮癖
春到廣寒興未平
月沽春漲

總題八景

邑歲貢生 崔允貞

疏煙微雨棗城紛
春際月沽生穀紋
夜靜高河橫野渡
曉封杏

慶雲縣志

藝文志

詩歌

六十四

岸障浮雲鐘敲東嶽晨
光爛笛弄西山日暮聞
雁和漁歌聲亂處會看
岡上現龍雲

八景詩次劉韻

天津道 薛柱斗

蒼茫古樹倚雲端
無棗城邊駐馬觀
聞得漁樵頻喚侶
綠陽深處好盤桓
棗城煙雨

漁火三更照戍樓
梵梵婦子且淹留
來朝若得無風雨
不到桃源不繫舟
高河夜泊

浪說南陽第一流
而今勝跡屬瀛洲
鱗光日映金千點
肯卧令飛瑞色浮
龍岡晴嵐

金風浙瀝雁初征
中澤猶存樂土情
只為衡陽魂欲斷
相依荻

畔和漁聲 雁灘漁歌

東嶽晨鐘鎮日催岱雲深處絕塵埃陰陽禍福因心造說與吾民莫浪猜 東嶽晨鐘

西山落日映霞標絳葉淒淒林外飄蚤是秋聲聽不斷無端短笛客魂銷 西山暮笛

二月蠶工六月紗晚邀明月早餐霞吞雲數畝翻將遍不管黃鸝罵杏花 杏岸晚雲

水泛桃花月泛明胡蘇河畔草含情遊人遠眺尋芳處一幅春圖繪太平 月沽春漲

遊寄青園

陶岐

慶雲縣志

藝文志

詩歌

六十五

地僻園偏勝孤亭構北城渡橋遮柳影坐石靜蟬聲鼓瑟音加亮携尊興倍生主人情意重仲舉足高名

登臨津樓

邑歲貢生 劉敏

層樓高步海天空俯瞰河流歛澗中疏鑿常懷明德遠山川無改霸圖雄欄橫烏嶺嵐光紫窗射龍岡日影紅見說登臨千古事何人作賦仲宣同

咏古柳

邑諸生 鄧鑄公

疏黃嫩綠靄晴煙萬狀杖杆拂碧天時有流鶯繞樹底忽驚彩鳳咏瑶篇 先一日李夫子曾為咏及 千條風雨疑波湧幾度春秋帶霧眠漫道成圍只暫賞宅前宋玉自年年

翠映亭

雄縣人李權聖用

翠映亭幽幾樹森主人高卧日長吟古來多少交遊客未解當年居易心

高津

知縣李興祖

高津環遶棗城邊水澗誰還理釣船漫說中流曾鼓柁徒看古渡已揚鞭決排事復籌今日疏鑿功猶記昔年為憶九河名尚在不堪憑弔海為田

天宮寺

尋幽何處好緩步到天宮古木神鴉老迴廊落日紅談經跌片石飛錫自高高鐘磬時聞響悠然萬慮空

慶雲縣志

藝文志

詩歌

六六

王比部之窠祠

誰云遺愛止甘棠蘚蔓殘碑立道傍一意鋤奸甘就僂千秋崇祀永流芳老松常護青宮月疏竹猶凝白簡霜多少遊人爭墮淚居然羊祜在襄陽

中秋城頭晚眺

孤城四望極溟濛薄暮登臨興不窮幾處寒砧落日誰家長笛咽秋風烟鎖柳岸疏疏綠霜變楓林歷歷紅記得南樓邀月上
上一尊曾與故人同

慶雲余舊治也單車再至竹馬歡然因念疇昔賦以志感却憶分符始高津重來已歷數年春試看滿路栽花處猶是當

年騎竹人留憇晴郊棠尚在行經麥隴雉仍馴停車重訪論文
友次第相攀勸酒頻

寄題臨津樓二首

齊北燕南鎖要衝名城無棟舊稱雄地傳賜履開周治蹟蹟疏
河念禹功龍卧雲連岡口翠蜃興日盪海門紅憑高帝座通呼
吸只遜如椽賦筆工

瀛東下邑記鳴絃彈指前塵二十年千樹栽來花滿郭一樓聳
處水平川吟情每憶行騶外客夢常遶落雁邊見說新加輪奐
吳城南風物更堪傳

檢災慶雲道中

按察司鍾
使僉事 諤

慶雲縣志

藝文志

詩歌

六十七

斥鹵何年變綠疇富民談笑取封侯地如絕塞無青草望處行
人欲白頭記里鼓難分步尺區田策擬遍方邱海邦戶籍原來
少試向先齊問爽鳩

寄陳將軍二首

歸德
諸生 侯方域 朝
宗

聞道乾坤更用兵天南高卧倚長城神京左臂能安枕瀚海前
年想繫纓

內府何時賜錦袍從軍不易建旌旄天閑出塞龍堆遠菴笛臨
秋漢月高

簡河晚眺

陳良弼 夢
集

橋頭一望暮天低烟水茫茫四野迷飛鳥翔空銜落日歸雲擁

樹拂平堤無舟不礙嚴光釣有柱何勞司馬題散步歸來秋色晚空留明月照前溪

延陵臺吊古二首

邑拔貢生 陳良翰 季宣

碧蘚猶餘血淚痕幾曾金氣虎騰蹲三號不盡千年恨一坎徒傷萬里魂蔓草縱橫空白露鼉鼉吟嘯自黃昏宣尼一過堪今古地變天荒尚可論

一自翩翩上國遊興亡人代幾悠悠谷陵地變餘衰草洞火燒殘有廢邱吳苑繁華歸幻夢棟郊寂寞已松楸乾坤處處英雄窟一眺荒臺萬古愁

郊行

知縣 蔣錫震 豈潛

慶雲縣志

藝文志 詩歌

六十八

微官羈絆總無聊信馬閒行興自饒花藥宜人來借履鄰莊問酒去攜瓢酣歌初勒思橫樂落日平原看射雕詞賦未能供羽獵此身豈合老漁樵

宜題臨津樓

宜興人 儲在文 子中

高樓迢遞俯河滄檻外浮雲自古今齊履舊傳無棣遠禹功惟見高河深風生畫棟歸寒浦烟滿璇題接暮林何日披襟攜綠玉月明陂上動清吟

鄧節婦詩 集唐

阮學浩 裴園

蜀魂啼處夢初醒舊事淒涼不可聽南國斷釵雙鬢白北邙化石萬峯青慈雲護靄迎鸞詔愛日留春課鶴經湘女怨絃愁不

禁是誰翻得雨淋鈴

鄧節婦詩

學使 羅源漢南川

明月如鏡有時缺鳳翼雙飛有時折慶雲慈母檜栢身地老天
荒名不滅青春矢志守空幃誓比共姜腸寸裂相從地下迴不
難為有貌孤未忍決明珠一顆天所佑含泪撫摩氣嗚咽烏啼
鵲怨春復秋食糜飲冰長苦冽屏除膏沐調滫瀡孝養承顏寸
衷竭携持黃口侍堂前鶴髮含飴一忻悅午夜和丸佐讀書養
成德氣仁且哲蜚聲譽序重璠璣畫書詩各稱三絕孫曾亦成
雛鳳凰封胡羯末綿瓜瓞德門食報安可量不負九泉人訣別
頭盈雪心似鐵數十年來一腔血君不見春官陳疏達朝廷綽

慶雲縣志

藝文志 詩歌

六十九

楔千秋表芳節

口占贈慶雲胡聖與 十歲工草書

獻縣 王餘佑 五公山人

曾道英才推謝尚還看奇穎邁崔駟鼠鬚迅掃冰蠶滑不數鵝
池妙入神

次慶雲作

直督 方觀承

霧氣潮痕黯不收孤城已盡海東頭蓬茅十室寒常早羨碑終
年飽即休井養有泉添沃澤橋成無棟減湍流憂民治歲臣何
事聖主恩深每預籌

為慶雲令甘怡題歲甘橋碑 并序

慶邑大道界高津古河行人病涉甘令集眾力成長橋

請名余余以慶非屢豐而今能用民力未易成此師曠
占云歲欲甘甘草先生蔣因命名歲甘橋即以寓令之
姓氏俾長存焉

民事理如家長橋役匪奢官賢崇勿翦歲稔蔣先花載道歌行
轍崇題紀斷沙拈毫愁腕弱為爾興能加

歲值荒歉管明府賑濟多方恭成四絕以頌德政

庠生 劉夢梅

秋禾一望盡煙波衆口嗷嗷可若何幸有廉明賢父母已飢已
溺費心多

賑濟原難再少延奉行誰似我公賢官倉虛後民倉實却轉無

慶雲縣志

藝文志 詩歌

七十

年為有年

單騎簡從到田間父子家人總一般計口均分遺憾少慈顏常
帶淚痕還

總然淡泊自相安枵腹窮經亦是難共集琴堂歌飽德書聲即
作頌聲看

對鏡

邑進士 劉 煦 魯齋

老景蕭條老態成老人諱老亦通情對君不敢言君老壯志於
今猶未平

郊行

邑諸生 解培 拍築岩

往日經行地重來認舊蹊草深嫌路仄水長覺橋低陌裊風前

柳村啼日午鷄祇今回首處彷彿未全迷

頰河隱居述懷

邑諸生王孫蘭 紫 晚

白首水雲居孤高任所如雨荒三徑草日上半床書料理丁年志渾忘丙穴魚兒曹應怪我底事棄耕漁

寫懷

一燈苦守耐窗寒白首羞從鏡裏看六十餘年文字債至今償得不曾完

登慶雲奎樓

訓導趙 曄 霽 光

危樓俯看古黃河暮色蒼蒼接逝波冀野風煙同海運齊州疆域共星羅雙橋影暗行人少一水春明宿鷺多為問桃花三月

慶雲縣志

藝文志 詩歌

七十一

兩白沙灘上幾漁蓑

龍岡晴嵐

吳士泓

中州曾識卧龍岡風景依稀各擅長既有雲霞叱渤海可無人物繼南陽晴光遠接千林翠嵐氣遙分半榻涼最喜編氓勤職業治安堪與說羲皇

東嶽晨鐘

河督張 井 芥 航

惕然宿夢驚鐘聲出林樾君子惺其心不待晨鐘發

丁卯九日宿尚家堂題壁

知縣潘國詔 雲 留

征車輾轉起勞塵北邁南徂似雁臣萬木得秋多老態重陽無雨亦愁人窮檐赤子關吾隱古壁青燈伴此身領會任棠孟水

意一官况味慣清貧

高河夜泊

高津河與海東連蕩樂城南夜泊船幾幅蒲帆收夕照一聲漁
鼓隔秋煙生來不受風塵沉到此重尋水月緣相去桃源知遠
近虛舟乘興任飄然

秋日登卧龍岡

振衣岡上勢崢嶸俯瞰河流氣未平寂寞夜光淪蔓草蒼茫秋
色暗長城南陽人往餘風古東海潮回曉日晴歲早若為霖雨
用還應騰起潤蒼生

向辰出宰河南路過慶雲詩以勗之

公子名向辰嘉慶辛未進士即用知縣

慶雲縣志

藝文志

詩歌

七十二

知縣 張濟川 春帆

瓊林宴罷跨征鞍勒馬津門入問安桂殿承恩新令尹椿庭垂
訓老郎官河陽春早花先種淇澳風生竹細看能讀父書承父
志庶幾子孝父心寬

不須稱佛與稱仙讀聖賢書志聖賢每飯未嘗忘赤子焚香便
可告青天一身肥瘠民飢飽百口膏脂邑俸錢欲借官箴作家
訓存心愛物意纏綿

讀書何必讀申韓想到無民盡法難生若可求生已苦死真無
憾死誰安身為嚴父威惟畏談在慈君猛亦寬于氏高門陶入
甕二公都是用刑官

也曾二月坐棠陰贏得詩留去後吟金鑒易窺千載意玉壺已
貯十年心辛酉入直需次於今十年幾忘猿鶴深山怨不見親朋空谷音擬
作遂初圖一幅抱孫聽汝夜鳴琴

觀風勗書院諸生

雁在前灘龍在岡天開文運井中央固因前哲科名盛更喜時
賢姓字香工部公門無片紙謂劉可亭員外孝廉史席有三長謂崔念堂院長
里問曾否知欽式事友私心未敢忘

儒服儒冠席上珍豈徒聲價重齊民一心憂樂關天下萬卷詩
書友古人偶有所思當在遠最無聊賴莫言貧菜根齧出真滋
味方許人間立此身

慶雲縣志

藝文志 詩歌

七十三

村居漫賦

邑進士劉廣恕可亭

已作歸田計悠然物外情只憐還故我何必歎浮生釀酒開新
甕藏書有舊楹間間村舍好聊費小經營

其二

幾載辭京洛村居亦有情時聽稚子讀閒閱野人耕高枕窗前
卧斜陽陌上行鄰翁偶相值稼圃話分明

不寐

邑明經劉因矩絜方

寒夜不成寐披衣起立頻秋風吹敗草明月照愁人文字工何
益詩書老更親白頭今已矣何地可棲身

辛酉花朝題慶雲崔曉林詩卷

遂寧張問陶船山

直勝崔黃葉清嚴數首詩巖居知我早
珊網得君遲關說無王
礎憐才此項斯謀生同不易相對歎移時

其二

誰賞種稼鶴林棲久耐寒魁格真面目樸雅舊衣冠
孤抱輕華
士清言接古歡成連絃指妙東望海雲寬

題慶雲崔曉林詩卷

錢塘 吳錫麒 穀人

天風吹海雨齊上七條絃空洞真無際寄欵信此賢
聞聲空谷
喜努力令名傳莫忘移情處殷勤待刺船

老烏山

張若峪

馬谷西來水一灣駟山盡處是烏山憑欄試看斜陽裏
無數寒

慶雲縣志

藝文志

詩歌

七十四

鴉接翅還

棣城烟雨

邑舉 崔 旭

昔時無棣縣烟雨古城荒春色寒青草人家隱綠楊
冷雲空杳
靄故址但蒼茫水墨遙堪寫憑誰畫擅場

高河夜泊

暝色孤城下河流如此清蒼黃人競渡鴉軋夜聞聲
漁火依沙
白蘆花隔岸明堤邊纔換舵已打縣樓更

龍岡晴嵐

蜿蜒卧龍岡坡陀水一方河流通馬谷嵐氣壓虹梁
草積烟深
碧沙晴日淡黃誰懷經世業早晚起南陽

雁灘漁歌

好是漁歌起西風落雁灘
何人獨唱晚幾處正驚寒
遠水秋聲接荒蘆夕照殘
閒情堪領略擬把釣魚竿

東嶽晨鐘

鐘鎔鐘音發晨光入望迷
清霜猶水外殘月忽城西
西嚮聞征車鐸聲連野店
鷄古槐門尚閉漸有曙烏啼

西山暮笛

暮色蒼然至西山望轉深
蕭條吹短笛縹緲有清音
遠客家千里微風月半林
上方秋夜靜更聽水龍吟

杏岸曉雲

慶雲縣志

藝文志

詩歌

七十五

霽麗雲猶凍微寒杏著花一隄
隔春水十里映朝霞白舫乘陰
宿青帘露影斜晨鷄深樹裏
時見酒人家

月沽春漲

滾滾桃花水月沽春綠忙
三篙添雨色一鑑瀉天光
深沒魚標短時飛柳絮香
小船堪載酒興到廣寒長

題延陵臺

何人埋骨此荒臺爭說三號季子
回論地幾同千里遠傳疑已
過百年來詩歌憑吊終多誤
賢喆遺蹤未忍猜大有豪華留古
塚斷碑殘表不堪哀

高津竹枝詞

高津河畔水平沙無棣城邊草芻茅城外春風河上雨陰晴天
氣杏開花

野鳥聲聲嫂打婆耬田稼樹事偏多河邊知有農桑樂不管征
人早晚過

河水西通老虎倉河流東過卧龍岡岡前到海無多遠不比風

波道路長

衛河減水壩在
德州北老虎倉

秋風吹雪木棉開沿岸人家上集回共說街頭蝦醬賤大沽河
口海船來

繡野亭荒落晚暉老鳥山上暮鴉飛漁燈閃閃纜收網一貫新
魚換酒歸

慶雲縣志

藝文志

詩歌

七十六

河上秋林八月天紅珠顆顆壓枝圓長腰健婦提筐去打棗竿
長二十拳

登萊歸客此魂銷麥餅豚肩酒一瓢東嶽鐘敲城月落征車早

度歲甘橋

橋為登萊青
三府孔道

臨津樓上看花時明月沽頭晚漲遲水月有緣花滿郭邑人解

唱使君詩

邑令李公臨津樓詩有千樹栽來花滿郭
潘公高河詩有到此重尋水月緣之句

經下水厓至袁家莊

騎驢向城南逐處閱農圃秉穗滿秋場暫息場邊樹行行至前
村舊宅時一顧去此五十年廬舍全非故詎知舊主還適與故
人過往事說孩提老顏感衰暮一一訪鄉鄰昔人存有數何異

化鶴歸飛來遼東路

下河厓田舍

上塚屢經過少小村居日豈知六十年積俸有此室草屋四五
間低小僅容膝宅後數畝田禾稼頗蒙密晚丘生青苗秋棗垂
朱實北望見先塋古栢森鬱律買田隴畔心後久尚無失

南村

菜蔬生東圃禾稼滿南阡偶逢相識人情話何流連年貌非篤
老胡為早歸田簿書與耕稼勞逸當相懸如何食廩祿養此桑
榆年食祿固為好曠官詎非愆於世既無補所願老林泉

下河厓田舍

慶雲縣志

藝文志

詩歌

七十七

城南小邱厓乃是柴桑里秋田時收穫乘興遂來此黍稷已蒸
炊菽粟漸積累鄰曲逐夕來說稼各自喜言辭雖粗俗一一舍
妙理人散輒高眠醒即披衣起

其二

田舍寂已曠野外聞征鴻晨興出柴扉初日正在東稼收川原
曠棗剝林樹空零露沾衰草煙霧何空濛健鶻翔寥廓野鳥棲
幽叢昔作宦遊客今作田舍翁

其三

農夫喜秋成禾稼滿場圃日聞碌碡聲簸揚力共努秋歛亦云
勞况當種入土苗出日望長田乾日望雨揮鋤汗交流曝背日

當午有田知催租誰識佃人苦

和題慶雲八景圖

採梁園唱和集四首

棣城烟雨

桐城舉人 費樹藩友

十丈紅塵捲無端洗碧空古城喬木聳附郭密雲籠父老滄桑
歎兒童游釣同殘山與剝水多少煙雨中

杏岸晚雲

花亦爭時媚枝頭色競紅寒梅已彫落新柳半蔥蘢多受東風
寵喜逢旭日烘堤南煊染處得意馬蹄中

月沽春潮

流水本無定有時漲幾篙况逢湍勢急倍覺浪痕高印月成圓

慶雲縣志

藝文志 詩歌

七十八

影翻空作怒濤棹歌聽夜夜歸思上征袍

東嶽晨鐘

城東誰志古遺跡認前朝梵語催潮上鐘聲入夢遙曉晴開遠
樹晨渡過荒橋有客吟詩健騎驢破寂寥

五十述懷

邑舉人 劉東里

流光彈指信堪憐碌碌名場又幾年漸老欲籌歸隱地雖貧猶
辨買書錢怕聽衙鼓敲清夢喜訪山僧話舊禪莫怪晚來頗好
道浮雲多見是虛緣

晚行

邑歲貢 張咸五 頌

林棗離離豆綴花綠槐村外夕陽斜獨騎瘦馬秋風裏一路蟬

聲送到家

看花

邑舉 崔 暘 時 林

天地自無私花開有早遲開花莫羨早先落向南枝

對月

莫怨人心太不平炎涼自古有同情無私只此天邊月照到貧家一樣明

釣竿

罷官後自號 柳陰釣者

邑舉 崔光箕

超出塵埃外秋風一釣竿青蓑憐野老白首棄儒官魚漾波初定鷗閒夢未闌柳陰真自在兒輩共盤桓垂老歸真隱何愁兩鬢侵幽閒今日境出處古人心野稼低迷影秋蟬斷續音多情

慶雲縣志

藝文志

詩歌

七十九

懷往事落雁聽彈琴

秋日感懷

邑舉 王應台

蕭蕭古木下林邱太息光陰似水流千里征鴻風入塞一聲長笛月當樓乾坤何處逢青眼身世如斯欲白頭四十年來成底事不堪把酒看吳鉤

劉將軍 揮 殉節詩

樂陵 薛 侶

未盡餘氛恨若何憑將義勇殄么麼明知寡衆難為敵狼獾猶揮赴鬪歌

鷓鴣寒膏一劍孤班班血漬紫苔枯英靈定倚江邊壘為護都

戍八陣圖

弔指揮劉錫之世祿殉節

滄州于昌耀燕

生必願對吾主誓不敢奉乃祖頭有簪纓身佩組不念從來過
安補率卒七人猛於虎賊似鼠時維九月日當午殺人如草紛
難數一戰再戰不成功留得丹心照千古嗚乎指揮可對吾主
嗚乎指揮無奉乃祖

慶雲縣雜詩

知縣 桂山香南

分藩賜履昔稱雄古棣城高落照紅幾度臨風獨惆悵山河無
恙霸圖空

憑眺蒼茫眼界空臨流懷古思無窮九河故跡分明在猶是當
年大禹功

慶雲縣志

藝文志 詩歌

今

輕寒輕暖逗芳菲又見簷牙乳燕飛正是清和好時節棗芽初
長麥初肥

葦花瑟瑟柳毵毵新水平橋漾蔚藍間步高津河上望依稀風
景似江南

一望人家處處同茅茨四壁淡煙籠絕無峻宇雕牆習質朴猶
存太古風

壤僻鄉窮宰亦貧只餘一事可驕人宋唐三李名千古俱是當
年舊部民 後唐宰相李愚宋尚書李之純朝請大夫李之儀皆邑人

新築無棣城雜詠

知縣 吳國棟

虎踞龍盤壓高津雲烟新鎖一城春八千子弟辛勤甚宿露餐

風十二句

既勞民力又傷財父老功成笑語回歸去倒騎牛背穩非公事
莫入城來

慶雲縣卸篆留別

知縣 陳鶴鳴

地分無隸古稱雄勤儉猶存蟋蟀風政每翻新開進化我惟守
舊勸農工巖疆漸喜萑蒲淨比戶欣看稼穡同攬轡流連當車
午炊烟滿樹野雲封

題劉小韓茂才湘帆詩草四首

桂 山

高津河水氣縈洄毓秀鍾靈出草萊省識春風詩一卷棣城今
亦有澹臺

慶雲縣志

藝文志 詩歌

八十一

如此清才竟不辰文章憎命果何因無端振觸西風裏我亦當
年羶穉人

閒吟細寫寄幽情散佚清晨眼忽明掃盡人間烟火氣五言端
的是長城 集中五言特佳

能安澹泊是儒風傲骨峻嶒迥不同一語寄君應破涕詩人自
古例多窮

題慎餘堂詩鈔

武進莊 護 藹 人

慶邑多古風人情安質樸士也讀且耕野處有名宿天倫欣聚
處名繯厭馳逐勤儉守家風敦龐勵末俗邇雖俗少瀉世家尚
檢束我讀慎餘堂佳篇清且穆門庭至孝存出處俱知足或名

登杏苑水部遠揚馥或仕任花封清績字留牘魯宮芹藻多傳
野著義伏名章與佳句吟咏資飽腹俱不樂任進歸田享遐福
卯金多賢裔小韓吾所熟持篇以示余謂是手鈔錄先人手澤
在家風亦可矚殘編與斷簡不忍輕棄讀賢哉此懷抱孝敬睦
宗族推此後必大軾軻終戡穀如遺子一經如拾珠一斛留以
俟剗刷牙籤耀篇幅

慶雲卸篆留別諸寅好並東古棣書院諸生

知縣 黃仲禽 東松

長隄官柳拂籃輿澹沲新秋識面初去日尚餘風滿袖來時敢
謂雨隨車心香虔注精誠版手榜親題節孝盧留與此邦賢父

慶雲縣志

藝文志 詩歌

八十二

老他年認取數行書

慶邑秋早為文步禱東郊應時疊沛甘霖邑紳公牒籲請以孝子秦玉堂割股療親

及孝婦張董氏二十年守節皆親書匾旌其閭

每居城市似山林古邑栖遲恆素襟故里松蘿牽遠夢小園花
竹助清吟典型儉朴田疇舊香火因緣翰墨深此後月沾溪上
月書聲琴韻動關心

高津如鏡淨塵埃薄宦間關策蹇來詩境澹宜檀篆香訟庭閑
對菊花开諸公衮衮懷英畧羣顏翩翩號雅才他日棣城春滿
縣碧桃猶認手親栽

還我閒身與拙宜鬢華雖老未成絲三杯別釀誰能遣一酌廉
泉更可為世事嘗從退步想人情須看去官時蕭條行橐輕於

籜却少沈香擲水湄

送劉小韓明經應京兆試

揚州舉人 華寅 冰谷

身世何須怨坎坷離奇潤玉韞山阿縱然苦試酸鹹味難得生
逢甲子科薦鶚定為懷利器化龍終是織機梭相逢一面緣何
淺遠道驪駒正浩歌

吊張瑄戊辰殉難

邑歲貢生 王忱 藿園

狼奔鼠竄共張皇戰鬪君非素擅長孤注當前憑一擲男兒死
喜在沙場

劉小韓明經以所刻慶雲詩鈔及自作竹枝百詠見貽賦

詩報謝

知縣 楊承杰 仲椒

慶雲縣志

藝文志 詩歌

八十三

清才如此困劉蕢標格嶽寄愜素聞閉戶幾曾交熟客立言端
不負斯文闡揚巨筆流芳久遊戲新辭慨世殷邑有明賢知恨
晚黃花時節始逢君

莫要荒涼斗大城扶持有客主騷盟題詩在上推崔顥著作由

來繼更生

宋劉義叟經歐陽公薦辟著作郎修十三代史

學宗劉向故字仲更余適舉君修畿輔通志 高水

烟波供嘯傲龍岡風雨好躬耕放衙竟夕無塵事貪玩瑤編坐
夜明

讀劉小韓明經所刻慶雲詩鈔及自作竹枝詞奉贈二絕

天津舉人 林駿元 杏農

得意揮毫唱竹枝情真語摯性靈詩可知名下無虛士桑梓非

遙識面遲

不綴魏科姓氏揚鴻文壽世亦流芳三津久識詩人望家有傳
燈衍澤長

劉小韓明經贈慶雲詩鈔棣城百咏二種因即集中九日

登高韻成詩奉贈

知縣王元起

高水權教作涓濱自甘韜匿守吾真論詩幾欲無餘子考獻何
期有偉人八代扶衰情思切一方掌故簡編陳幽潛闡發功九

鉅續修邑乘君秉筆焉著述於今已等身

邑侯桂香南夫子山鑄余慶雲詩鈔及所作竹枝詞謹賦

二律以謝知遇之恩

邑人劉希愈

慶雲縣志

藝文志 詩歌

十四

卅年辛苦費旁搜採擇今逢鐵網收前輩有靈宜下拜此編何
幸得長留一朝刊布榮華袞萬古流傳重璧球不獨廉明誇德
政許公風雅擅千秋

俚句同鑄費俸錢欣逢賞鑑亦前緣敢誇調古留千載直感恩
深到百年知遇真難今世報姓名俱藉我師傳竹枝唱出人休
笑展卷同稱令尹賢

邑侯楊仲椒承蒸因修畿輔通志命余編輯邑志賦以誌

幸

自愧生平寡見聞小儒亦得與斯文搜羅直欲窮山澤慎重真
如續典墳但願傳留無缺限不辭寒暑費辛勤成心俱化私心

去知過方堪對使君

延聘原來是二人旋將大任付余身

初浼崔雅甫表文同修雅翁旋疾作命余獨任其事

敢云筆削全由我須知鑒觀應有神班馬文章難與比春秋義

例自知遵追思五十年前事誰識狂言竟作真

余成童時閱邑志慨然曰他日

我亦修之自悔出大言此事真不及料也

自書

富貴成虛願年華過六旬一生甘守拙兩字是安貧心靜無忙

事門清少雜賓姓名如有問今世古遺民

無棣懷古

彈丸小邑景無窮禹水烏山在眼中疏鑿千年明德遠招懷萬

慶雲縣志

藝文志

詩歌

八十五

古霸圖雄觀瀾遙憶名賢迹挂甲爭傳國士風幸際承平同樂

業自憐小技尚雕蟲

題健余詩草

審判廳文安舉人

李蘭增楚香

高情猶未遂瞻韓一卷新詩愜壯觀愧我無才終伏櫪羨君大

雅獨登壇聰明冰雪成三昧似續風騷併二難

公子統疇惠記疇皆詩家

取金門舊佳句典型留與後人看

題健余詩草

歲貢生 丁鳴鑾 通駿

羨君才氣本縱橫評定出自李先生

陝西舉人李景孚

文章昔年客京

華王子為示指南車

樂陵翰林王榮館

詩學在君等閒事拔幟立幟自

一家恨吾才學多拘蹙風塵書劍徒鹿鹿故紙終年鑽不出羊

公有鶴猶學舞捻紙分韻強作詩魯班門前掉大斧

悼馬君奇峯捍賊遇難

增生 劉培之

千里煙烽願掃平。胸中百萬練鄉兵。儒生定有伏波志。為國捐軀死亦生。

棣城烟雨

馬龍潭

迷茫烟雨卷樓臺。古棣城邊話劫灰。隔岸綠楊如畫裏。滄桑憑吊幾徘徊。

高河夜泊

布帆幾幅夕陽收。高水烟籠客艤舟。星月滿天人未睡。推蓬子細數更籌。

慶雲縣志

藝文志

詩歌

八十六

龍岡晴嵐

高岡蜿蜒互晴空。瑞色葱龍掩映中。最好嵐光看雨後。松林隱隱卧長虹。

雁灘漁歌

蘆花風靜夜潮平。燈火星星半滅明。兩岸漁舟齊唱晚。灘頭宿雁幾回驚。

東嶽晨鐘

半鈎殘月落長隄。曙色頻催野店鷄。百八鐘聲醒好夢。塵心敲斷畫堂西。

西山暮笛

數聲長笛萬山秋暮靄蒼茫獨倚樓客夢家山千里隔西風天末不勝愁

杏岸晚雲

朝霞絢爛鬪春妍杏雨香中泛畫船十里紅雲青一點酒家旗子露村前

月沽春漲

月沽岸畔柳藏鴉載酒遊人興正賒一鑑波光春瀉碧水痕三尺漲桃花

棗城烟雨

棗城不可見烟樹影模糊日腳穿雲密雷聲入遠無滄桑悲轉

慶雲縣志

藝文志

詩歌

八十七

瞬荆棘亂平蕪牧豎都歸去深林叫鷓鴣

高河夜泊

暮色荒城下扁舟柳外停烟迷滄海月船壓高河星市散人聲寂風來水氣腥明朝挂帆去直到綠楊汀

龍岡晴嵐

橫亘高河岸龍岡浮紫烟楊花晴滾雪嵐氣遠吞天村落浮堤外波瀾動日邊登高一憑弔沙草鬱蜿蜒

雁灘漁歌

漁唱西風裏烟波靜掩門日高人曬網水落樹懸根秋色迷前渡樵歌答遠村釣歸魚換酒招月入芳樽

東嶽晨鐘

殘月橫天白曉暎出海紅
疏鐘穿老樹古寺柱蒼穹
鈴語禪林寂鷄聲茅店空
何人先早起步屨棗城東

西山暮笛

何處笛聲起西風古棗城
秋深霄漢遠月澹斗牛明
蕉葉縈新感梅花譜舊聲
幽人眠不穩竟夕草蟲鳴

杏岸曉雲

夾岸杏飛花野橋一半遮
雲蒸三月雨樹染漫天霞
春冷鶯藏柳河乾水走沙
青帘林末出知是酒人家

月沽春漲

月沽春水發滾滾入長河
帶雪吞平楚塞天捲白波
桃花古渡冷柳絮小橋多
我欲携樽酒輕舸訪素娥

慶雲縣志

藝文志

詩歌

八

登蚯蚓山

撫松蚯蚓山險峻異常賊據其巔官兵不得進
剿山後懸崖千尺下臨深澗深夜由絕壁攀援

而上攻賊之背無一免者
因占一律聊紀鴻爪

絕壁臨深澗崔嵬砒古山
石蹲驚虎伏足健試猿攀
著手藤三尺當頭月一彎
將軍自天降小醜盡夷刪

征蒙道中

羽書飛檄走倉皇歲暮行軍裹糗糧
月黑風高何處宿夜深猶聽馬蹄忙

鐵騎沙場冒曉寒雪花如掌撲征鞍
燼餘村落留殘火滿目瘡

夷淚眼看。

朔風凜烈捲塵沙。馬上詩成興自賒。千古男兒皆報國。胡奴未滅敢言家。

渡松花江

壬寅初冬赴吉林剿匪。渡松花江。冰凌初結。人馬不能踏渡。乃攀危石履巉巖而過。乘匪不備。

一鼓而殲。

陡崖天險水滔滔。攀葛藤升意氣豪。力闢盤叢探虎穴。凱歌夜唱月輪高。

邊城閱校

塞外秋深九月寒。一鞭雲影壓征鞍。消魂最是斜陽裏。紅樹山頭馬上看。

慶雲縣志

藝文志

詩歌

十九

自述

十載疆場百戰身。據鞍矍鑠倍精神。封侯本是男兒事。銅柱勳名莫讓人。

豪傑從來鐵血多。莫將寶劍任空磨。健兒具有好身手。願與同胞贊共和。

登鳳凰山

鳳山名勝幾經游。古洞清幽水自流。欲上白雲最高處。烟波直看海東頭。

金石

隋源文宗德政碑殘缺原文

前法曹 事功曹孫子路主簿燕子

繇事 事張 計曹掾邢建戶曹掾言仕

軍曹 曹 法曹掾燕璆事曹掾劉彥

曹史傳寶 戶曹史王赦興 戶曹史郝思群 戶曹史賈義

曹史李仲 軍曹史衡元 軍曹史 方 禮曹史李

重子明 士曹史周雲 士曹史吳

慶雲縣志

藝文志

金石

二十

玄德方之魚水其為比興豈虛

匡時翬也者何代無人君諱文

祖為西戎所逼以眾臣魏天子嘉

司徒隴西惠生父子恭司空文獻公

思以 於君君器宇深沈 儀爽朗

枉客座有勝賓思若淵泉調諧律呂

為慕 之友至

軍臣

法曹史耿士祭

維那杜

法曹史郭豐禮

維那郭

士曹史王萬歲

維那王

法義諒敬孫

維那口

維那

慶雲縣志

藝文志

金石

九二

續畿輔通志金石目云此碑係慶雲崔氏所藏

此碑縣郭氏所藏殘碑近踈慶雲吾族弟荷泉手石出近奉故
舟人均未著錄碑稱公諱文字下滅不可辨莫能攷其時代姓

氏或因文中有魏天子字呼為魏碑書賈以有隴西字冒稱李
文殘碑津門孟志清侍御以字畫定為北齊時物今攷北史源

賀傳賀西平樂都人私署河西王禿髮儁檀之子也儁檀為乞
伏熾盤所滅賀奔魏太武聞其名賜爵關內侯以功封隴西王

即碑中祖為西戎所逼呂眾臣魏云云也子懷受父爵例降為

公卒贈司徒謚曰惠即碑中司徒隴西惠也子子恭懷長子邕
子恭當其

次子閔帝初呂定策勲封臨汝縣子卒贈司空謚曰文獻即碑中

生父子恭云云也子彪字文宗魏永安中以功賜爵臨穎伯後
事齊入周歷仕俱顯隋開皇中拜莒州刺史遇病去官卒碑中
叙其先世始末官爵名謚無不與史合符當即文宗去官屬吏
頌德之碑無疑惟稱字文宗與碑稱諱者未合然檢本傳凡叙
事出名處皆稱文宗而不稱彪意當日必以字行矣其弟名文
威傳中一
見益知彪之名
當以文宗行矣然則非魏齊時碑蓋隋碑耳光緒癸巳仲春念
五日蘭西崔炳炎跋尾

此碑鹽山蘭西族兄攷北史源賀傳辯為源文宗任莒州刺史
頌德之碑上下右三面皆殘缺祇餘右方存二百三十餘字碑
中有君諱文口祖為西戎所逼以衆臣魏司徒隴西惠生父子

慶雲縣志

藝文志

金石

九十二

恭司空文獻等字文下字漫漶世遠年湮風雨剝落上截首却
似立字但下微存示字之形余細為詳審恐後人不識宗字隨
意摹刻將蓋頭左右兩點磨去橫畫下加二豎以失宗字真形
翁覃溪兩漢金石記云漢曹全碑初出時止缺一因字後乃中
有斷裂又後乃乾字中曰有穿連之直畫矣又中間咸曰君哉
咸子咸內口上一畫是彎曲倒折之筆今石泐而其旁一小直
畫不可見遂成二小橫畫矣此碑宗字原屬模糊後人妄意增
減竟改為立字首未免失其本來矣文宗以字作名此例自漢
以後多有之按漢故民吳仲山碑隸釋云碑無其名仲山其字
也唐書房玄齡字喬顏師古字籀馮登府金石綜例云晉後名

字不分或以字行故字與名皆諱之六朝人多以字行至唐亦然文宗為隋荊州刺史民人沐其德惠叙其先世官爵功績名謚以為頌德之碑遂循向例稱之漢曹全碑張遷表亦然碑陰有維那名姓魏書釋老志云維是網維華言也那是梵語譯為知事隋書百官志後齊制昭元寺掌諸佛教置大統一人統一人人都維那三人唐六典每寺皆置都維那一人綱統衆事即今之僧官然沈濤常山貞石志云北朝唐宋諸石刻稱都維那維那者不盡僧人大都里中豪右倡率鄉愚修造祠廟者為之此碑陰故有維那諸字益信蘭西兄所識荊州刺史源公德政碑確實無疑光緒二十一年乙未秋日荷泉崔鴻圖識

慶雲縣志

藝文志

金石

九十三

管家寺石佛像久載邑志宣統元年己酉春寺僧安福往山東惠民縣紀任莊住持並佛像移之去冬適值續修畿輔通志上憲札飭各州縣保存金石詢及此佛像縣令徐君簡書由山東運回置城內西隅天宮寺門外余與解君芸湘陳君寶軒往觀共出資移至寺內繼縣令程公蒞任談及此石佛並天宮寺銅恐天宮寺殘破不克護持欲倡捐重修程公因事調省事遂輟癸丑前任丁君紹容因公到慶邀余遊寺中見石佛像面目手足跌角殘缺以致字畫剝落不全而銅佛亦多損壞太息者久之憇憇余設法修葺當即先捐錢數十千並邀劉君少舟族兄左泉寺僧從福赴城鄉募集月餘工竣是役也朝夕監視不辭

勞悴實劉君之力為多特將二佛像殘缺情形詳記於左
天保八年朱姓所造玉石像三尊立像正座一陪座二下有蓮
花盆並鐫雲龍細紋佛圓光後有陰文鐫佛像不甚清晰跌高
營造尺八寸二分正面橫二尺七寸五分上刻人物兼有東龕
主朱顯和西龕主解零就寶塔主朱秀林邑人朱大像開明主
朱靈和等字右側二十六行行十字文載縣志不再錄第二十
五行朱元下字殘當是貴字二十六行邑人下殘二字當是朱
柒後面計三十四行行二十字第三十四行九字第一行邑人
下殘三字當是朱顯邕第二行朱下殘二字當是領眾三行朱
赦下殘一字當是興字第三十四行朱糜下殘一字當是納字

慶雲縣志

藝文志

金石

九十四

左側二十六行行十字第一行朱有下殘當是興字二行元下
殘當是敬字天保齊文帝年號以東魏八年受禪改元天保余
存天保七年歲次丙子八月造像八年當是丁丑

一武平六年比丘尼圓照圓光所造雙弥勒玉石像三尊已殘
缺跌高營造尺八寸右側橫五寸五分字三行一行六字父朱
祖歡像主二行三大字張秀仕三行三小字王仕寬後面橫二
尺銘文載縣志不再錄未有比丘尼仲苑五大字右側四行
一行息叔言二行息摩耆三行息摩訶四行大像主朱難武平
當是齊後主名緯年號造像年月姓氏字帶隸體而文理粗俗
猶存漢魏遺風按孫星衍京畿金石攷載此目誤以圓照為寺

名管誤作管玉石誤作碑寺名本為德安以村屬管姓故俗呼
管家寺云二像已歷世千有餘年矣余系性嗜古特叙巔末俾
後之覽是記者知保國粹隨時修整庶世遠年湮不至淹沒是
則余之厚望也甲寅夏閏五月初六日崔鴻圖記

慶雲縣志卷之四

新政志第十一

學務

高等小學校於光緒二十九年九月知縣陳鶴鳴邑紳劉鴻逵王蔭翕等由古棣書院改建校內設校長一名教員三名夫役三名厨役一名舊章四年畢業民國新章改為三年至今學生畢業者計甲乙丙三班共五十二名其常年經費約三千緡有奇原係古棣書院舊存底款及庚子教案賠款餘銀不與他學款相混近新添入者見後

附本校經費歷年出入始末

慶雲縣志

新政志

學務

九十六

創辦之始運憲李公邦楨撥書院庫平二千兩由縣署發商按月一分行息每年息銀二百四十兩又庚子教案賠款餘銀共庫平銀四千八百七十二兩由縣署發鹽店按月一分行息每年息銀五百八十四兩六錢四分又書院田租每年六百二十八千五百九十文又息錢成本京錢四百二十四千發鋪商按月一分行息每年息銀五十千零八百八十文又民國二年春經議事會賣大劉莊及柴林莊書院義田地價共四百餘千由公署發商會按月一分行息息錢約五十千有奇又儒學學田五項餘每年租價約五百千之譜自民國三年春撥歸本校作擴充之費

模範初學校。於民國二年創辦。校內設校長一名、教員一名、學額定四十名、每歲經費約七百十有奇、悉出自畝捐。

初級師範傳習所。於光緒三十二年創辦。傳習生五十一名。三十三年。傳習生四十六名。畢業後。即約停止。經費係臨時畝捐。單級師範傳習所。於民國三年二月創設。內設所長一名、管理員一名、正教員一名、副教員三名、講習生五十四名、六個月畢業。經費約一千五百吊。由儒學地租與公署墊辦。

城鄉初等小校。於光緒三十二年創設。後以漸擴充。公立者七十五處。每處歲發與公款一百三十十。悉出自畝捐。私立者三處。女子初校。私立者三處。勸學所。於光緒三十三年創設。內設

慶雲縣志

新政志

學務

九十七

總董一名、勸學員二名、經費每歲約九百餘千、悉出自畝捐。至民國二年五月裁撤。改設縣視學。

宣講所。閱報所。於民國二年八月創立。內設宣講員一名、經理員一名、經費每歲約一百七十十、悉出自畝捐。

警務

警務公所。於光緒三十二年冬創修。當開辦之初。止城內設警兵四十餘人。警務由縣官管轄。至三十三年六月。始設警官。宣統二年。復改名警務長。現一縣分為四區。共設區官四名、巡長一名、巡官四名、馬巡二十名、步巡八十名。經費每年約一萬六千餘吊。悉出自畝捐。

警務學校、當縣令丁綸恩創辦之始、所招警兵、皆未經教練、至光緒三十二年冬、始設校長一名、教習二名、教練巡警學生四十名、係四個月畢業、及三十三年、設巡警總董、警官丁子文、陸續教練巡警學生四班、民國二年冬、又教練一班、均係甘盡義務、畢業後、即停辦、其經費、悉出自畝捐。

政治各機關廢興始末

親民局、於光緒三十一年、由知縣丁綸恩設立、局紳共二十人、輪流執班、清查四鄉廟地、共二十項有奇、盡行歸公、收其地租、作警務學務底款、至三十三年、局名取銷。

自治局、於光緒三十三年、知縣章紹洙、由親民局改設、劃分縣

慶雲縣志

新政志

警務

九十八

內為八區、區各設局、票舉正副區董十六人、是年派局紳清丈河淤地、共二十項有奇、其地租現作行政公署經費、至三十四年、知縣和紳布、因籌辦學警、每畝加捐京錢六十文、四六折分、由各區局經理收支、宣統二年、知縣李澤宸、詳請隨糧帶征、改由城內經收、改區局為巡警分局、自治局為自治公所。

議事會、參事會、於光緒二年冬、自治公所取銷後、始行成立、內設正副議長、及議員二十人、至民國三年二月、議參兩會、皆奉令裁撤、歸公署經理、其經費由廟產項下支領、至所費若干、現已無案可稽矣。

理財所、於宣統三年冬設立、一縣財政、各機關所出納款項、胥

歸此局總理。內設董事二人、經理、地方行政。一切經費。至民國二年五月改組公署成立。因以裁撤。

勸業所。於宣統三年設立。其經費由廟產項下支領。至民國二年五月改組公署成立。因以裁撤。

農會於民國三年設立。內設會長一人、副會長一人、會員四十餘名。其經費悉出自牛肉捐。四鄉農會亦成立。

商務分會於民國元年成立。設正副會長各一人。會員無定額。其經費由各會員捐助。

戒煙局於光緒三十四年。由知縣和紳布設立。至民國二年五月改組公署成立。即行裁撤。

慶雲縣志

新政志

機關興廢

九十九

附庚子教案始末

本邑地處偏僻。洋人蹤跡罕至。故交涉之事亦鮮。至光緒二十六年。拳匪滋擾。而教案以始。方拳匪之初起也。由黑牛王驢夫李某傳於西。公解某投子。縣令夏聲喬不之禁。且喚入署中演觀之。並賞以食物。此風一倡。城鄉遂紛紛效尤。於是境內各祠宇。以及文廟書院。皆被拳匪安爐焉。遂借言仇教。向四鄉抄掠。始而教民受害。繼而平民遭殃。其終也。拳匪與回民結仇。拳匪與拳匪亦為敵。斯時也。無官無民。皆如坐針氈之上。疑鬼疑神。直共游荆棘之中。生民之苦。至此極矣。及八月間。聞天津拳匪為聯軍所敗。官軍將臨。勢難抵禦。踞慶各拳匪。遂紛如鳥獸散。

未幾張勳率兵至，誅拳匪主謀李某，舉黑牛王痛剿之。邑民始重見天日，方謂可安枕無憂矣。不意至十月初九午刻，忽聞聯軍已至鹽山，居民大恐。時方大雪，扶老攜幼，終夜奔波泥淖中，瞻鳥爰止，於誰之屋，亂雜景象，觸目驚心。初十日晨刻，雪愈大，風愈緊，天寒地凍，路少行人。洋兵在鹽，聞已出隊，不堪其苦。且聞慶邑貧甚，無可覲覩，遂止不進。慶邑幸得免於厄，始悟天之雨雪，乃所以佑慶雲也。迨邑人心尚未至大干天怒耶。二十七年，邑令歐陽公繡之，設安撫局，延請邑紳劉鴻逵、王熙春等經理賠撫各教諸款項，而美國牧師某君、英國牧師牧大衛君、法國司鐸戴君偕同知沈君金鑑、六邑總紳甯君星晉至縣，隊官

慶雲縣志

新政志

教案始末

一百

于君桂林率兵保護之，戴始至，即挾令先殺韓某，並抄沒其家。以張威武、閻邑震動，遂會同官紳開議商酌，賠撫各教銀錢數目。英美二牧師皆敦篤邦交，意主和平，惟戴司鐸純用強權，每一人命索銀七十兩，屋一間，索錢八十吊，共為數十八萬吊，不稍退讓。官紳墮淚，甯君以為數太多，忿欲辭歸。歐陽公亦束手，勢將決裂，人心惶惶，竟無善策。劉王二紳婉說以司鐸至中國，代教友索賠款，六邑均已告成，若因區區慶雲議數不成，以累全局，料司鐸必不其然。戴首肯，漸有轉機，乃復請甯君出讓錢三萬吊，歸十五萬吊之數。且言係與道憲會商賠款數目所定，條例如此，無可再減。官紳以國勢孱弱，力不能抗，不得已允之。

而教案始有結果。人心大定。其間任勞任怨。多方婉轉。以求濟事者。固非事後所能盡知。亦不過畧述其難苦之情狀而已。計共賠耶穌教五萬吊。聖道堂三萬吊。天主教十五萬吊。除罰款外。每畝令捐京錢六百文。先交三百。本邑地瘠民貧。何能堪此。幸所賠天主教數內。提出十萬吊。歸大賠款。至年底所捐之三百文。尚未交全。而撫銀二萬兩。自津領至。民得稍蘇。事後結算。尚餘銀四千八百七十兩。作為辦理高等小學校底款。亦云幸已。

慶雲縣志卷之四

雜志第十二

志何以雜不一類也不一類何以志無類可歸仍不欲削也何以不削乎爾備聞見垂勸戒也夫靈宗冲寂闡慧化以拯人聖旨淵澄刊彫形如濟物斯蓋垂怜理寬流慈汎育者矣然今朱氏邑人等皆淨行童年覲蕩三塵練心早日望除九難遂以天保八年十二月敬造玉石象一區廣倫盈尋其崇兩及畫比望舒夜光奄月瓏瓏之美九宇無以方其奇皎皎之潔八方莫能比其麗上願皇祚永延邊方寧太存亡同津含生等潤都維那朱靈振邑人朱黑等同造大齊武平六年歲次乙未五月甲寅

慶雲縣志

雜志 軼事

百零二

朔二十六日己卯佛弟子比丘尼圓照圓光姊妹二人為亡妣兄朱同敬造雙彌勒玉石像一區上為皇帝陛下羣僚百官州郡令長又為七世先亡見存眷屬一切含生有形之類並沾斯福乃為頌曰我我玉象妙飾窈元光同五色淨境交連真如法眼庇願昌延上為考妣捨家財珍敬造聖容留音萬年

管家寺石佛座

刻文二

軼事

唐太和二年滄州刺史李同捷拜充海節度使矯言軍中留已命王智興出討凡七閱月破之敬圍滄州文宗命金吾大將軍李祐代烏重允領滄州留後事智興將李君謀以輕兵絕河夜

殘無棣與同捷連合明年祐拔無棣同捷乞降祐覺其詐斬之
傳首京師以下舊志名宦

唐廣明元年無棣人洪霸郎為盜齊棣間平盧節度使安師儒
遣將王敬五擊平之

宋建隆二年無棣男子趙遇作亂稱帝太祖遣南陽節度使崔
彥進會保順軍擊破之遇敗走蘇軾李伯時畫李端叔真贊云
鬚髮之拳然眉宇之淵然披胸服之掀然以為可得而見與則
漢乎其無言以為不可得而見與則已見畫於龍眠矣嗚呼將
為既琢之玉以役其天乎其將為不雨之雲以抱其金乎抑將
游戲此世而時出於兩者之間也

蘇文忠
公集

慶雲縣志

雜志

軼事

百零三

李之純登進士專以埋首為念吏徐熙專為宣力計其所藏無
慮萬計一日金華街王生死復甦云見冥官曰爾以誤追今當
還人間陰司事雖禁洩露然為善之效亦欲人知李之純葬骨
有功與知成都府一任徐熙督役有勞與一子及第汝宜傳於
世後皆如其言

為善陰
騭錄

舊聞

王明清揮塵後錄云李端叔之儀趙郡人我才學聞於世弟之
純亦以政事顯名為中司入座終以老龍帥成都兄弟頡頏於
元祐間端叔於尺牘尤工東坡先生稱之以為得發遣三昧東
坡帥定武辟為簽判以從朝夕酬唱賓主甚懽建中靖國初為

樞密院編修官曾文肅薦於祐陵擬賜出身擢右史成名未頒而為御史錢遜論列報罷去國之後楚泊潁昌值范仲宣公疾篤口授其指令作遺表上讀之悲愴之餘稱賞不已欲召用之而蔡元長入相時事大變祐陵裂去御書世濟忠直之碑及降旨御書院書碑旨揮更不施行且興獄治遺表中語端叔坐除名編管太平州會赦復官因卜居當塗奉祠著書不復出任自號姑溪老農有集六十卷

按宋史作無棣人畿輔通志誤分為二一入慶雲一入趙州之純之儀從

死此作弟非是

姑溪居士前集五十卷後集二十卷宋李之儀撰王明

清揮麈後錄稱之儀尺牘最工然他作亦神鋒俊逸具蘇軾之

一體軾嘗題其詩後有每逢佳處輟參禪句註家謂諷其艱澁

慶雲縣志

雜志 舊聞

百零四

今觀其詩實無郊島鈎棘之態知為附會其詞矣

四庫全書簡明目錄

宋嘉定四年五月紅襖賊寇樂陵鹽山逼近無棣橫海軍節度

使王福連擊敗之賊首張衆來寇又大敗之

以下舊志名宦

明正德六年流賊楊虎破城剽掠甚慘時山東按察司僉事徐

達守武定率兵追至板捷營接戰賊兵大潰東走海岸進平之

明祝廣文繼元司慶雲鐸卒於官其弟太僕寺丞繼龍哭以詩

云記取滄瀛共被時此來欲見杳無期孤兒扶櫬歸新壟諸子

談經憶舊師鴻鴈羣分驚昔夢紫荊花卸動遐思周觀遺澤猶

生氣一霎西風萬淚垂先師像萬曆八年知縣王三益得之三

教古廟中法像奇古移於孔廟

前志祀典

順治辛卯慶雲縣南三里村婢病瘍不相容出外乞食數日忽作狂言言禍福輒驗遠近流聞競往問之有田生者素未相識即道其姓氏里居且曰子數日人耳幸亟歸毋留也田生倉皇而去數日果歿又曰某月日河水將大上四縣胥沉百姓其魚乎已而果然此不知何嘗也

陳尚古簪
雲樓雜說

壽官有賈舜民胡顯成侯守禮劉進祿李思孟解自明胡從德侯珮程朝顯崔朝科馬汝傑武早十二人前志明諸生崔陟菟鄧同藩耆老崔朝科程朝顯清耆老李鳳麟杜含秀王豐熙賈慎動王尚廉武舉皆與鄉飲前志

同知王定鼎考授州同劉經舉人陳于陞諸生胡纘先周於德

慶雲縣志

雜志

舊聞

百零五

耆老張標皆與鄉飲



